

22

註 121
673
部大:78



51

文獻通考卷第三百

鄱陽馬端臨貴與著



物異考六

金異

周威烈王二十三年九鼎震 顯王三年雨金於櫟陽
赧王五十九年周亡秦昭王取九鼎其一飛入泗水
餘八入於秦中

漢武帝元鼎元年夏五月得鼎汾水上 四年六月得

寶鼎 元封元年詔曰朕禮首山昆田出珍物化或為

黃金 應劭曰昆田首山下田也武帝祠首山故神為出珍物化為黃金 征和二年春

涿郡鐵官鑄鐵鐵銷皆飛去此火爲變使之然也其三
月涿郡太守劉屈氂爲丞相後坐祝詛腰斬 成帝河
平二年正月沛郡鐵官鑄鐵鐵不下隆隆如雷聲又如
鼓音工十三人驚走音止還視地地陷數尺鑪分爲十
一鑪中銷鐵散如流星皆上去與征和二年同象其夏
帝舅五人封列侯元舅王鳳擅政譖殺丞相王商京兆
尹王章許后坐廢趙飛燕爲后賊害皇子成帝亡嗣一
曰鐵飛屬金不從革按鑄鐵而鐵不成正金不從革之
異也而西漢五行志以爲火不炎上誤矣今並革而正
之

後漢明帝永平六年二月王雒山出寶鼎廬江太守獻
之詔以初祭之日陳鼎於廟以備器用賜三公以下帛
有差 十一年灤湖出黃金廬江太守以獻

湖在廬州
合肥縣

章帝建初七年幸槐里岐山得銅器形似酒樽獻之
魏明帝青龍中盛修宮室西取長安金狄承露盤盤折
聲聞數十里金狄泣於是因留霸城此金失其性而爲
異也

吳孫權赤烏十二年寶鼎出臨平湖 孫休永安三年
得大鼎於建德縣

晉惠帝元康三年閏二月殿前六鐘皆出涕五刻止前

年賈后殺楊太后於金墉城而賈惡不止故鐘出涕猶傷之也 永興元年成都伐長沙每夜戈戟鋒有火光如懸燭此輕人命好攻戰金失其性而爲變也天戒若曰兵猶火也不戢將自焚成都不悟終以敗亡 懷帝永嘉元年項縣有魏豫州刺史賈逵石碑生金可採此金不從革而爲變也五月汲桑作亂郡寇颺起又清河王覃爲世子時所佩金鈴忽生起如粟者康王母疑不祥毀棄之及後爲惠帝太子不終於位爲司馬越所殺 程氏演繁露曰晉語云墓碑生金庾氏大忌初不曉生金爲何等語按吳淑事類賦引魏志曰繁昌

縣傳禪碑中生金表送上羣臣盡賀王隱晉書曰永嘉中陳國項縣賈逵石碑中生金人盜鑿取以賣賣已復生此江東之瑞也其曰瑞者晉爲金行故金生爲祥元帝中興其應也据此而言則碑中誠生黃金矣亦異事哉

元帝永昌元年甘卓將襲王敦旣而中止及還家多變怪照鏡不見其頭此金失其性而爲妖也尋爲敦所襲遂夷滅 石季龍時鄴城鳳陽門上金鳳凰二頭飛入漳河 海西太和中會稽山陰縣起倉鑿地得兩大船滿中錢錢皆輪文大形時日向暮鑿者馳以告官官夜

文獻通考卷三百
一一一
遣防守甚嚴至明旦失錢所在惟有船存視其狀悉有錢處安帝義熙初東陽太守殷仲文照鏡不見其頭尋亦誅翦占與甘卓同也

陳後主禎明二年五月東冶鐵鑄有物赤色大如斗自天墜鎔所隆隆有聲鐵飛破屋而四散燒人家東冶者陳人鑄兵之所鐵飛爲變者金不從革之應天戒若曰陳國小兵弱云其後卒亡

隋堯君素守蒲州兵器夜有光如火火礫金金所畏也敗亡之象

劉武周據并州兵勢甚盛城上稍刃夜每有火光

唐垂拱三年七月魏州地出鐵如船數十丈廣州雨金金位正秋爲刑爲兵占曰人君多殺無辜一年兵災於朝神龍初東都白馬寺鐵像頭無故自落於殿門外天寶十載六月大同殿前鐘自鳴占曰庶雄爲亂宰臣李適之常列鼎具饌羞中夜鼎躍出相鬪不解鼎耳及足皆折乾元二年七月渾天儀有液如汗下流元和中翰林院有鈴夜中文書入則引之以代傳呼長慶中河北用兵鈴輒自鳴與軍中息耗相應聲急則軍事急聲緩則軍事緩光化四年冬武德殿前鐘聲忽嘶嗷天復元年九月聲又變小

後唐天成中僞漢欽州羅浮山民掘得古劍有篆文曰
已與水同宮王將耳口同尹來居口上山岫護重重以
獻僞王劉陟國人莫之辨及平廣南競傳其言知者云
太宗以已亥年降誕是已水同宮也於文耳口王爲聖
尹口爲君重山爲出蓋已亥年聖君出也

晉開運三年六月登州文登縣地內湧出金銅佛像四
漢乾祐元年三月中書厨釜鳴者七是月宰相李濤罷
免勒歸私第

宋建隆二年七月晉江神山縣北谷中有鐵隨水流出
方二丈三尺其重七十斤 至道二年二月桂陽監鎔

銀自涌成山峯狀 咸平四年十二月亳州大清真宮鐘
自鳴 大中祥符六年九月臨江軍清江縣民李公邁
至雲騰廟前過遇小童贈塊土還家剖之得天尊人主
像五軀 慶歷四年五月乙亥撫州金谿縣得生金山
重三百二十四兩 至和五年正月湖南提舉常平劉
欽言蘆荻衝出生金重九斤八兩狀類靈芝祥雲又淘
得碎金四百七兩有奇十一月越州言民戶拾生金湟
州丁羊谷金坑僅千餘眼得鑛成金共四等計一百三
十四兩有奇 崇寧四年三月鑄九鼎用金甚厚取九
州水土內鼎中旣奉安於九成宮車駕臨幸徧禮焉至

北方之寶鼎忽漏水溢於外劉炳謬曰正北在燕山今寶鼎但取水土於雄州境宜不可用其後竟以北方致亂 建炎三年吉州修城役夫得髑髏棄之水中俄浮一鐘有銘七十六字大畧云唐興元吾子歿瘞廬陵西壘後當火德五九之際世衰道敗浙梁相繼喪亂章貢康昌之日吾亦復出是邦東平鳩工復使吾子同河伯聽命水官時郡守命錄之僅錄畢而鐘自碎近金爲變怪也 紹興十一年王管成都等路茶事馮康國言三月庚申金虜居長安兵刃皆生火光天變豈直示虜亦示國家以恢疆之圖此與晉志永興初成都伐長沙戈

戟火光及唐志劉武周稍刃火光同占輕人命好攻戰金失其性爲光怪也兵猶火也弗戢自焚敗亡象也二十六年七月辛酉夜天雨水銀與唐志貞觀廣州雨金同占金位正秋爲刑爲兵占曰人君多殺無辜一年災於朝是歲成都郫縣地出銅馬高三尺工制甚精中宵風雨輒聞嘶聲 紹興中秦檜別墅農夫耕鑿得金甕重二十四鈞 慶元二年正月泰寧縣耕夫得鏡厚三寸徑一尺二寸照水徹底對日爭輝病熱者鑑之心骨生寒後爲雷震而碎十二月吳縣金鷲鄉銅錢百萬自飛漢書陰盛陽微金鐵爲飛

玉石之異

春秋昭公八年春石言於晉晉平公問師曠對曰石不能言神或馮焉作事不時怨讟動於民則有非言之物而言於是晉侯方築虎祁之宮

虎祁地在絳西臨汾水

劉歆以為

金石同類是為金不從革失其性也劉向以為石白色

為主屬白祥 昭公二十四年王子鼂以成周之寶湛

於河津人得之河上陰不佞取將賣之則化為石

見白祥門

漢孝昭元鳳三年泰山有大石起立

詳見白祥門

成帝鴻

嘉三年五月乙亥天水冀南山大石鳴聲隆隆如雷有頃止聞平襄二百四十里許壘雞皆鳴石長丈三尺廣

厚畧等旁著岸脅去地二百餘丈民俗名曰石鼓石鼓

鳴有兵是歲廣漢鉗子謀

鉗子謂鉗徙牢係重囚處

攻牢篡死囚鄭

躬等盜庫兵劫掠吏民後四年尉氏樊並等謀反殺陳

留太守山陽亡徒蘇令等黨與數百人盜庫兵經歷郡

國四十餘皆踰年乃伏誅時起昌陵作者數萬人徙吏

民作治五年不成與晉石言同應師曠所謂民力彫盡

傳云輕百姓者是也

魏明帝青龍元年張掖柳谷口水溢涌寶石負圖狀象

靈龜立於川西有石馬七及鳳麒麟白虎犧牛璜玦八

卦列宿孛彗之象又有文曰大討曹此晉之符命而於

魏為妖好攻戰輕百姓飾城郭侵邊境魏氏三祖皆有其事石圖發於非常之文此不從革之異晉定大業多斃曹氏石瑞文大討曹之應也

吳孫亮五鳳二年陽羨離里山大石自立 孫皓天璽

元年鄱陽言歷陽山石文理成字凡二十云楚九州渚

吳九州都揚州土作天子四世治太平始江左傳曰歷陽縣有石山

臨水高百丈其三十丈所有土穿駢羅穿中色黃赤不與本體相似俗相傳謂之石印又云石印封發天下當

太平有祠屋巫祝言石印神有三郎時歷陽長表上言石印發皓遣使以太牢祭歷山巫言石印三郎說天下

方太平使者作高梯上看印文詐以朱書石作二十字還以啟皓皓大喜曰吳當為九州作都渚乎從大皇帝

逮孤四世矣太平之主非孤復誰重遣使以印綬拜三郎為王又刻石立銘褒贊靈德以答休祥 又吳

興陽羨山有空石長十餘丈名曰石室在所長為大瑞

乃遣兼司徒董朝兼太常周處至陽羨縣封禪國山明

年改元大赦以協石文

晉惠帝永熙五年有石生於京師宜年里 永康元年

襄陽得鳴石丹陽湖有浮石真定獲玉馬詳並見白祥門 元

帝初渡江有玉冊見於臨安白玉麒麟神璽出於江寧

其文曰長壽萬年皆以為中興之驗焉 愍帝建興五

年石言於平陽時帝蒙塵亦在平陽故有非言之物而

言妖之大者俄而帝遇害

劉曜時終南山崩長安人劉終於崩所得白玉方一

尺有文字曰皇亡皇亡敗趙昌井水竭構五梁罅五各

反酉小衰困囂喪嗚呼嗚呼赤牛奮鞞直引其盡乎反

時羣下咸賀以爲勒滅之徵曜大悅齋七日而後受之於太廟大赦境內以終爲奉瑞大夫中書監劉均進曰臣聞國主山川故山崩川竭君爲之不舉終南京師之鎮國之所瞻無故而崩其凶焉可極言昔三代之季其災也如是今朝臣皆言祥瑞臣獨言非誠上忤聖旨下違衆議然臣不達大理竊所未同何則玉之於山石也猶君之於臣下山崩石壞象國傾人亂皇亡皇亡敗趙昌者此言皇室將爲趙所敗趙因

之而昌今大趙都於秦雍而勒跨全趙之地趙昌之應當在石勒不在我也井水竭構五梁者井謂東井秦之分也五謂五車梁謂大梁五車大梁趙之分也此言秦將竭滅以構成趙也罅者歲之次名作罅也言歲馭作罅酉之年當有敗軍殺將之事困謂困敦丁回歲在子之名元囂亦在子之次言歲馭於子國反當喪亡赤牛奮鞞謂赤奮若在丑之歲名也牛謂牽牛東北維之宿丑之分也言歲在於丑當滅亡盡無復遺也此其誠悟蓋欲陛下勤脩德化以禳之石虎時青州言濟南平陵城北石虎一夜中忽移在

城東南善石溝上有狼狐千餘迹隨之跡皆成路虎
大悅曰石虎者朕也自北而南者天意將使朕平蕩
江南也其勅諸州兵明年朕當親董六軍以副成路
之祥羣臣皆賀又有石燃於泰山八日而滅東海有
大石自立旁有血流鄴西山石間血流血長十餘步
廣二尺餘

慕容儁既僭位初石虎使人探策於華山得玉版文
曰歲在申酉不絕如綫歲在壬子真人乃見及此燕
人咸以爲儁之應也又常山大樹自拔根下得璧七
十珪七十玉光色精奇有異常玉儁以爲岳神之命

遣其尙書段勤以太牢祠之

齊高祖受禪之日滎陽郡人尹千於嵩山東南隅見天
雨石墜地石開有玉璽在其中璽方三寸文曰戊丁之
人與道俱肅然入草應天符掃平河洛清魏都又曰皇
帝運興千奉璽以獻按宋武帝於嵩高山得玉璧三十
二枚神人云此是宋分世之數三十二年二三十也宋
自受命至禪齊凡六十年云

梁武帝中大同元年春曲阿縣建陵隧口石辟邪起舞
後齊武成河清四年殿上石自起兩兩相對

唐貞觀十七年八月涼州昌松縣鴻池谷有石五青質

白文成字曰高皇海出多子李元王八十年太平太子
李世民千年太子李治書燕山人士樂太國主尙汪譚
獎文仁邁千古大王五王六王七王十鳳毛才子七佛
八菩薩及上果佛田天子文武貞觀昌大聖延四方上
不治示孝仙戈八爲善太宗遣使祭之曰天有成命表
瑞貞石文字昭然歷數惟永旣旌高廟之業又錫眇身
之祚迨於皇太子治亦降貞符具紀姓氏甫爲寡薄彌
增寅懼昔魏以土德代漢涼州石有文石金類以五勝
推之故時人謂爲魏氏之妖而晉室之瑞唐亦土德王
石有文事頗相類然其文初不可曉而後人因推已事

以驗之蓋武氏革命自以爲金德王其佛菩薩者慈氏
金輪之號也樂太國主則鎮國太平公主安樂公主皆
以女亂國其五王六王七王者唐世十八之數 開元
二十三年十二月己巳龍池聖德頌石自鳴其音清遠
如鐘磬近石言也 至德二年昭陵石馬汗出昔周武
帝克晉州齊有石像汗流濕地此其類也 上元二年
楚州獻寶玉十三曰元黃天符形如笏長八寸有孔云
辟兵疫曰玉雞毛白玉也曰穀璧亦白玉也粟粒自然
無雕鐫迹曰西王母白環二曰如意寶珠大如雞卵曰
紅靺鞨大如巨栗曰琅玕珠二形如玉環四分缺一曰

玉印大如半手理如鹿陷入印中曰皇后採桑鉤如箸
屈其末曰雷公石斧無孔其一闕凡十三置之日中白
氣連天 元和中文水武士護碑失其龜頭 太和三
年南蠻圍成都毀玉晨殿石爲礮有吼聲三乃止 四
年浙西觀察使王蟠治潤州城隍中得方石有刻文曰
山有石石有玉玉有瑕瑕卽休 廣明元年華嶽廟元
宗御製碑隱隱然有聲聞數里間淡旬乃止近石言也
南漢劉鋹時宮中井旁石自立行百餘步而仆

宋太平興國四年九月嘉州夾江縣民王詣得江石二
皆黝質丹文隱起成字一曰君王萬歲一曰趙二十一

帝 三年四月華州言秦嶺南石洞自開遣吏馬文則
秉炬視之入數十步得丹砂千二百粒獸形石六以獻
五年五月鄭州脩東嶽祠穿土得玉杵白 七年六
月深州陸澤縣民王緒田中得白兔逐入穴掘之得石
佛五十軀皆長尺餘 大中祥符五年四月慈州民饑
鄉寧縣山生石脂如麵可爲餅餌 天禧三年正月晦
潁州沈邱縣民駱新田間震雷頃之隕石三入地七尺
許 政和二年元圭始出晉州上一石綠色方三尺餘
當中有文曰堯天正其字如掌大而端楷類手畫者堯
字居右天正字綴行如左都堂驗視礮石三分而字畫

愈明又於堯字之下隱約出一瑞字位置始均蓋曰天正堯瑞云或謂晉陽堯都也方元圭出乃有此瑞殆宣和內禪之祥 政和三四年畿府汝蔡之間連山大小石皆變爲瑪瑙尙方取爲寶器玩甚富至宣和四年後御府所藏往往復變爲石而色類白骨此與周寶圭占略同 五年鄭州滎陽縣賈谷山麒麟谷採石脩明堂得一石有文曰明百官表賀 七年二月丙戌張杲言北嶽廟於廟側二十里黃山獲石柱十六條脩短闊狹皆應營造法式用建正門毫釐不差 建炎三年四月鼎州桃源洞大水巨石隨流而下石間成文或識者三

十二字其文曰無爲大道天知人情無爲寤冥神見人形心言意語鬼聞人聲犯禁滿盈地收人魂與唐志貞觀中鴻池谷石文同占 紹興元年潭州得白玉於州城蓮池中孔彥舟以獻於朝詔却之漢志以爲玉變近白祥與石怪同占後彥舟爲劇盜 乾道二年三月丙午夜福清縣石竹山大石自移聲如雷石方可九丈所過成蹊纜四尺而山之草木如故 慶元二年六月辛未黃巖縣大石自隕雷雨甚至山水湧出

白眚白祥

天雨毛地生毛

春秋左傳昭公二十四年十月癸酉王子鼂以成周之

寶圭湛於河以祭河也幾以獲神之助甲戌津人得之河上

陰不佞取將賣之則為石時王子鼂篡天子位萬民不

鄉號令不從故有玉變近白祥也癸酉入而甲戌出神

不享之驗云玉化為石貴將為賤也後二年子鼂奔走

而死

秦始皇二十六年鄭容遇江神持璧言祖龍死事

詳見人異

與周子鼂同應是歲石隕東郡民或刻其石曰始皇死

而地分此皆白祥炕陽暴虐號令不從孤獨治羣陰不

附之所致其歲始皇死後二年秦滅

漢孝昭元鳳三年正月泰山萊蕪山南匈匈有數千人

聲民視之有大石自立高丈五尺大四十八圍入地深

八尺三石為足石立處有白鳥數千集其旁眊孟以為

石陰類下民象泰山岱宗之嶽王者易姓告代之處當

有庶人為天子者孟坐伏誅京房易傳曰復崩來無咎

復卦之辭今易作朋來

自上下者為崩厥應泰山之石顛而下

顛墜

也聖人受命人君虜又曰石立如人庶士為天下雄立

於山同姓平地異姓立於水聖人於澤小人

武帝天漢元年三月天雨白毛 三年八月雨白鼈京

房易傳曰前樂後憂厥妖天雨羽又曰邪人進賢人逃

天雨毛

乾隆十二年校刊

文獻通考卷三百 物異六

四

吳孫亮五鳳二年五月陽羨縣離里山大石自立按京
房易傳曰庶士爲天子之祥也其說曰立石於山同姓
平地異姓干寶以爲孫皓承廢故之家得位其應也或
曰孫休見立之祥也

晉武帝泰始八年五月蜀地雨白毛此白祥也時益州
刺史皇甫晏伐汶山胡從事何旅固諫不從牙門張弘
等因衆之怨誣晏謀逆害之京房易傳曰前樂後憂厥
妖天雨羽又曰邪人進賢人逃天雨毛其易妖曰天雨
毛羽貴人出走三占皆應 太康十年洛陽宮西宜秋
里石生地中始高三尺如香爐形後如偃於武人盤薄

不可掘按劉向說此白眚也明年宮車晏駕王室始騷
卒以亂亡京房易傳曰石立如人庶士爲天下雄此近
之矣 惠帝元康五年十二月有石生於宜年里 永

康元年襄陽郡上言得鳴石撞宅江之聲聞七八里

永寧元年齊王冏舉義軍軍中有小兒出於襄城繁昌
縣年八歲髮體悉白頗能卜於洪範白祥也 太安元

年丹陽湖熟縣夏架湖有大石浮二百步而登岸民驚

噪蘇到相告曰石來干寶曰尋有石冰入建業車騎大

將軍東嬴王騰自并州遷鎮鄴行次真定時久積雪而
當門前方數丈獨消釋騰怪而掘之得玉馬高尺許口

齒缺騰以馬者國姓上送之以爲瑞然馬無齒則不得食妖祥之兆衰亡之徵按占此白祥也是後騰爲汲桑所殺而天下遂亂 成帝咸康初地生毛近白祥也孫盛以爲人勞之異也是後石季龍滅而中原向化將相皆甘心焉於是方鎮屢革邊戍仍遷皆擁帶部曲動有萬數其間征伐徵賦役無寧歲天下勞擾百姓疲怨咸康三年六月地生毛 孝武太元二年五月京都地生毛至四年而氐賊次襄國圍彭城向廣陵征戍仍出兵連年不解 太元十四年四月京都地生毛時苻堅滅後經畧多事人勞之應也 十七年四月地生毛

安帝隆安四年四月乙未地生毛或白或黑 元興三年五月江陵地生毛是後江陵見襲 義熙三年三月地生白毛 十三年三月地生毛明年王旅西討司馬休之又明年北掃關洛

梁武帝大同二年地生白毛長二尺近白祥也孫盛以爲人勞之異先是大發卒築浮山堰功費鉅億垂成復潰百姓怨嗟 太清二年九月地生白毛長二尺時侯景舉兵反

後齊河清元年九月滄州及長城之下地多生毛或白或黑長四五寸近白祥也時北築長城內興三臺人苦

勞役 天統初岱山封禪壇玉璧自出近白祥也岱山王者易姓告代之所玉璧所用幣而自出將有易姓者用幣之象其後齊亡地入於周隋高祖受周禪天下一統焚柴泰山告祠之應 武平三年白水巖下青石壁旁有文曰齊亡走人改爲上延後主以爲嘉瑞百僚畢賀後周師入國後主棄鄴而走

隋文帝開皇六年七月京師雨毛如髮尾長者三尺餘短者六七寸京房易飛候曰天雨毛其國大饑時關中旱米粟踴貴 十七年石隕於武安滏陽間十餘洪範五行傳曰石自高隕者君將危殆後七年帝崩 開皇

末高祖於宮中埋一小石於地以誌置牀之所未幾變爲玉劉向日玉者至貴也賤將爲貴之象及大業末盜皆僭名號 煬帝大業十三年西平都石文曰天子立千年百僚稱賀識者尤之曰千年萬歲者身後之意也今稱立千年者禍在非遠明年而帝被殺

唐調露元年十一月壬午秦州神亭治北霧開如日初曜有白鹿白狼見近白祥也 垂拱元年九月淮南地生毛或白或蒼長者尺餘遍居人牀下揚州尤甚大如馬鬣焚之臭如燎毛占曰兵起民不安 神龍二年四月己亥雨毛於越州之鄞縣占曰邪人進賢人遁 大

歷二年七月甲戌日入時有白氣亘天九月戊午夜白霧起西北亘天 五年五月甲申西北有白氣亘天 建中四年四月甲子京師地生毛或黃或白有長尺餘者 貞元四年四月淮南及河南地生毛 二十年九月庚辰甲夜有白氣八東西際天 太和三年八月西方有白氣如柱 六年二月蘇州地震生白毛 七年十月己酉西方又有白氣如柱者三 光啟二年四月有白氣頭黑如髮自東南入於揚州滅 光化二年三月乙巳日中有白氣亘天自西南貫於東北 天復元年八月己亥西方有白雲如履底中出白氣如疋練長

五丈上衝天分爲三彗頭下垂占曰天下有兵白者戰祥也

宋嘉祐七年三月徐州彭城縣白鶴鄉地生麵占曰地生麵民將饑五月濠州鍾離縣地生麵 熙寧元年荆襄間天雨白黿如馬尾長者尺餘彌漫山谷三月丁酉潭州雨毛 八年五月丁丑雨黃毛 元豐三年五月青州臨朐益都石化爲麵民取食之 靖康二年二月壬午夜四鼓白氣如虹自南亘北須臾移西南至東北天明而沒 建炎二年杜充爲北京留守一日天雨紙錢於營中厚盈寸明日與金虜戰於城下敗績錢金類

金兵象紙白祥也 三年三月白氣貫日未幾苗傅等作亂凡白氣之占皆為天下有兵戰之事白祥也 四年五月壬子夜北方有白氣十餘道如練語在赤祥 紹興元年二月己巳夜東南有白氣 十一年馮康國言三月庚申金虜居長安油酒皆變白色語在金傳及夜妖 此白祥也白者西方兵象也亦喪祥也後金酋亶為其下所弑 三十年十一月甲午夜西南有白氣出危入昴十二月戊申白氣出尾入軫貫天市垣 三十一年十二月辛丑白氣如帶東西亘天出斗歷牛 隆興元年十二月壬午夜白氣見西南方出危入昴 二年正月甲寅

夜西南有白氣亘天如帶 乾道元年正月庚午白氣見西北方出奎入參三月戊辰夜白氣如帶自參及角東西亘天四月丁酉夜白氣見西北方入天市垣辛丑夜白氣入北斗乙巳夜白氣入紫微垣十月己丑夜蒼白氣見南方入翼十一月丙寅白氣如帶出女入昴東西亘天 二年十二月庚午夜白氣如帶東西亘天出女入昴 淳熙十年正月戊子夜西南有白氣如天漢而明南北廣可六丈東西亘天歷壁至畢 紹熙五年六月壬寅夜白氣亘天自紫微至亢角己酉日入後白氣亘天頃刻而散 慶元五年二月癸酉夜東北方白

氣如帶自角至參八月甲子東北方有白氣如帶亘天
嘉泰四年十一月壬申晝有白氣分數道亘天 紹
熙四年十一月癸酉地生毛占曰兵起民不安後一年
韓侂胄用事卒有開邊毒民之禍

文獻通考卷第三百

文獻通考卷第三百一

鄱陽馬端臨貴與著
物異考七

歲凶

卽五行所謂稼穡不成也然則歲凶年穀不登蓋
土失其性所致而地震山崩之屬亦土失其性也
故以繼歲凶之後

春秋莊公二十八年冬大水亡麥禾劉向以爲水旱當
書不書水旱而曰大亡麥禾者土氣不養稼穡不成也
時夫人淫于二叔內外亡別

二叔謂莊公二弟仲慶父及叔牙

又因凶

飢一年而三築臺故應稼穡不成飾臺榭內淫亂之罰云

秦始皇十六年民大飢 十九年大飢

漢高祖二年關中大飢米斛萬錢人相食令民就食蜀漢 武帝建元三年平原大飢人相食 元鼎三年四月關東郡國四十餘飢人相食 元帝初元元年九月關東郡國十一飢或人相食轉旁郡穀以相救 二年六月關東飢齊地人相食

王莽地皇時天下大飢寇盜蜂起

後漢光武二年關中飢人相食 安帝永初二年京師

大飢民相食 桓帝延熹九年司隸豫州飢死者什四五至有滅戶者 獻帝興平二年關中大飢人相食啖白骨委積

吳孫皓時常歲無水旱苗稼豐美而實不成百姓以飢闔境皆然連歲不已吳人以爲傷露非也劉向春秋說曰土氣不養稼穡不成此其義也皓初遷武昌尋還建鄴又起新館壯麗過甚犯暑妨農官私疲怠月令季夏不可興土工皓皆冒之此修宮室飾臺榭之罰也

晉愍帝建興四年京師大飢 元帝大興二年吳郡吳興東陽無麥禾大飢 成帝咸和五年無麥禾天下大

文獻通考卷三百一
二
飢 穆帝永和十年二麥不登 十一年大無麥 孝
武太元六年無麥禾天下大飢 安帝元興元年無麥
禾天下大飢

北齊後主武平四年山東飢時大興土木窮侈極麗後
宮侍御千餘人皆寶衣玉食逆中氣之咎

隋煬帝大業五年燕代齊魯諸郡飢先是建立東都制
度崇侈又宗室諸王多遠徙邊郡

唐貞觀元年關內飢 總章二年諸州四十餘飢關中
尤甚 儀鳳四年春東都飢 調露元年秋關中飢

永隆元年冬東都飢 永淳元年關中及山南州二十

六飢京師人相食 垂拱三年天下飢 大足元年春

河南諸州飢 景龍二年春飢 三年二月飢 先天

二年冬京師岐隴幽州飢 開元十六年河北飢 乾

元三年春飢米斗錢千五百 廣德二年秋關輔飢米

斗千錢 永泰元年飢京師米斗千錢 貞元元年春

大飢東都河南河北米斗千錢死者相枕 二年五月

麥將登而雨霖米斗千錢 十四年京師及河南飢

十九年秋關輔飢 元和七年春飢 八年廣州飢

九年春關內飢 十一年東都陳許州飢 長慶二年

江淮飢 太和四年河北及太原飢 六年春劔南飢

九年春飢河北尤甚 開成四年温台明等州飢

大中五年冬湖南飢 六年夏淮南飢海陵高郵民於

官河中漉得異米號聖米 九年秋淮南飢 咸通三

年夏淮南河南飢 九年秋江左及關內飢東都尤甚

乾符三年春京師飢 中和二年關內大飢 四年

關內大飢人相食 光啓二年二月荆襄大飢米斗三

千錢人相食 三年揚州大飢米斗萬錢 大順二年

春淮南大飢 天祐元年十月京師大飢

宋明道二年南方大旱種粒皆絕人多流亡因飢成疫

死者十二三官作粥糜以飼之然得食者輒死墟里幾

為之空 建炎元年汴京大飢米升錢三百一鼠之直

數百錢人啖道殣骸無餘齧取水藻春槐葉以食 三

年山東郡國大飢人相食時金虜陷京東諸郡民聚為

盜至車載乾尸為糧 紹興元年行在越州及東南諸

路郡國飢以令郡發常平倉粟淮東京東西流民聚常州

平江府者多殍死亦令各郡賑之二年春兩浙福建飢米斗

千錢令憲臣移廣粟以賑時餽饟繁急民益艱食詔漕江東西上

寬浙 三年吉柳道州桂陽監飢皆令宣諭使賑之流

臣賑 五年湖南大飢殍死流亡者眾詔移粟減賦夏

潼川路飢米斗二千人食糟糠興元飢民流於果閭令漕

乾隆十二年校刊

文獻通考卷三百 物異七

臣賑秋温處州飢漕閩粟萬石以賑六年春浙東福建飢湖

南江西大飢殍死甚衆民多流徙郡邑盜起令帥臣部使者賑粟

勸分且漕廣粟以助夏四月蜀亦大飢米斗二千利路倍之道殍

枕藉令帥臣賑粟蠲賦是歲果州守臣宇文彬獻禾粟九穗圖吏部侍郎晏敦復言果遂飢民未蘇不宜

導諛坐黜爵七年夏欽廉邕州飢令常平使者賑粟九年江東

西浙東飢米斗千錢饒信州尤甚令出常平粟以賑十年浙

東江南薦飢人食草木令戶部條賑飢事下之諸路十一年京西

淮南飢令通商移粟十五年汀虔州以盜妨農令郡縣賑粟貸種

十八年冬浙東江淮郡國多飢令諸道常平使者賑粟紹興府

大飢民之仰哺于官者二十八萬六千人賑之不給人

食糟糠草木殍死殆半流民渡江至行都事上聞令臨

安府賑遣復業十九年春夏紹興府飢流如初明婺

州亦飢令常平使者賑集之二十四年衢州飢二十八年平

江府飢二十九年紹興府薦飢皆發常平義廩以賑隆興元

年紹興府大飢四川尤飢民食蕨根平江襄陽府隨泗

州棗陽盱眙大飢隨棗間米斗六七千令有司皆賑之粟二

年平江府常秀州飢華亭縣人食糝糠行都及鎮江府

興化軍台徽州亦躑食皆令守臣及常平使者賑之淮民飢流江南

者數十萬人詔內郡移粟施惠安集之乾道元年春行都平江鎮

江紹興府湖常秀州大飢殍徙者不可勝計州縣爲糜

乾隆十二年校刊

文獻通考卷三百五十五 物異七

五

食之行都城外為糜四十餘日數萬人是歲台明州江東諸郡皆飢令賑之粟夏亡麥 二年夏亡麥 三年九月

不雨麥種不入 四年春蜀邛綿劍漢州石泉軍大飢

邛為甚盜延八郡漢飢民至九萬人內出宸翰賜制置使汪應辰講行荒

政賜僧牒四百助之五年夏饒信州薦飢民多流徙徽州大飢

人食蕨葛台楚州盱眙軍亦飢令郡守部使者發廩移粟勸分秋冬不

雨淮郡麥種不入 六年冬寧國府廣德軍太平温湖

秀池徽和州皆飢令漕江西廣東粟以賑七年秋江東西湖南

十餘郡飢江筠州隆興府為甚人食草實流徙淮甸發廩

賑之不給詔立勸分賞格內出左帑淮郡亦薦飢金虜謀

知運麥於淮北岸易南岸銅鏹斗錢八千江西飢民流

光濠安豐間皆效淮人私糴淮鏹為耗荆南亦艱食宣撫

使下蜀粟以賑八年江西亡麥隆興府薦飢南昌新建縣飢

民仰給者二萬八千餘人先是去歲秋詔淮浙江湖諸路帥漕臣勸課二麥官借種

糧 九年春成都永康邛三州飢秋台州飢發江西米

賑 温婺州亦飢令各郡賑粟禁遏糴是郡國告飢詔盡發常平粟截上供賦以賑令帥漕臣申

勸種 淳熙元年浙東湖廣廣西江西蜀關外皆飢台

處榔桂昭賀尤甚令賑以常平義廩江西一道至六十二萬斛二年淮東

西江東飢滁真揚州盱眙軍建康府為甚詔賑以常平米弛賦通商

貨種糧勸布麥立勸分賞格是歲鎮江寧國府常州廣德軍亦艱食

乾隆十二年校刊

文獻通考卷三百一十五 物異七

六

皆賑 三年淮甸飢夏台州亡麥冬復施隨郢州荆門

軍襄陽江陵德安府大飢 四年春尤飢 令發屯田粟二萬六千五百餘石

以賑 六年冬和州飢泰通楚州高郵軍大飢人食

草木 皆賑 七年鎮江府台州無為廣德軍民大飢 令出

常平米賑之賑廣德軍至 是歲江浙荆湘淮郡皆飢 皆

賦于粟或一道 至十四五萬石 八年春江州飢人採葛而食 詔罷守

冬行都寧國建康府嚴婺太平州廣德軍飢徽饒州流

徙入淮郡者萬餘人 令兩淮漕臣授田江東帥漕臣賑

勸種麥遣使分行兩浙江東淮南路賑贍安集之令江

浙湖北行勸分賞格已亥浙東常平使者朱熹進對論

荒政請粟勸分及蠲田賦身丁錢上嘉納之十 九年

二月戊申詔江浙淮湖北三十八郡並免之

春大亡麥行都飢於潛昌化縣人食草木 出豐儲倉米

為糜以食之飢民之就食者一萬 浙西湖州浙東紹興

四千五百人流民一千五百餘人 府衢婺嚴明台州飢徽州大飢種稔亦絕 令常平使

北七郡薦飢 令帥臣賑之 蜀潼利夔三路郡國十八皆飢流

徙者數千人 令饒漕守臣分賑之 十年合昌州薦飢 令饒漕臣

恭州飢民就賑相踐死者三千餘人 十一年泉汀漳

州興化軍亡禾邕賓象州飢 令帥臣賑 十二年福建

飢亡麥江西廣東西飢 皆令帥臣賑 金州飢有流徙者 令郡

十四年金洋階成鳳西和州人乏食 令漕臣賑之 七月秀

州飢有流徙者 詔出粟二萬斛 臨安府九縣飢 令發廩

乾隆十二年校刊 物異七

石以 十六年夏成州亡麥冬階成鳳西和州薦飢饉

臣賑之乾道淳熙間上篤意民事勸課農桑宮中親蠶

後苑種稼藝麥以驗歲功間取民間繭麥觀之或繭薄

穗短則歉然為農婦不滿修圩浚渠廣勸種麥遇水旱

之變則發廩予財蠲賦已責移粟勸分郡國殿最視荒

救為升黜一時吏治篤厚風俗趨本奏對者多言農田

水利方守血食之神非順成不加封爵歲雖小儉莫不

疾呼於上發粟往哺競以民庸自見故荒政靡歲不聞

然家給人足行都米斗五六錢江淮荆襄粒米狼戾

蜀楚斤至十餘錢民物阜樂庶幾小康夫豈一日之積

哉趙雄嘗奏得南康守臣朱熹書言荒政之行民戴上

恩凶年化為樂歲上曰陳峴亦奏蜀雨暘時若民俗熙

恬農事天下大本朕未嘗不念邇來士大夫方知以農

事為重以虛浮為耻又曰朕不鬻爵以

清入仕之源惟以賑飢推官乃為民也 紹熙二年斬

州飢 粟萬石 夔路五郡飢渝涪為甚 令漕臣賑粟七萬

階成鳳西和州亡麥 三年資榮州亡麥普敘簡隆州

富順監皆大飢亡麥殍者甚眾流民聚成都府至千餘

人威遠縣棄兒且六百人為糜以食飢民八萬餘人多

不能活 詔出緡 揚州亦飢 令出粟十 四年簡資普州

飢綿州亡麥 均賑 夏紹興府亡麥安豐軍大亡麥

五年冬亡麥苗行都淮浙西東江東郡國皆飢常明州

寧國鎮江府廬滁和州為甚人食草木 詔出帑廩鬻僧

之或一郡至五萬緡石不給航廣粟以續之令憲 慶

漕常平使者所部勸分免賦通商禁遏糴收棄兒 慶

元元年春常州飢民之死徙者眾楚州飢人食糟粕淮

浙流民多聚於行都 上念郡國賑恤未至詔部使者守

興慶元鎮江府常湖秀州 三年浙東郡國亡麥台州

江陰軍夏賦而賑之粟

乾隆十二年校刊

物異七

大亡麥民飢多殍襄蜀亦飢 四年秋浙東西薦飢多

道殣 六年冬常州大飢仰哺者六十萬人潤揚楚通

泰州建康府江陰軍亦乏食 皆令守令賑之 嘉泰元年浙西

郡國薦飢常州鎮江嘉興府為甚 皆令常平使者賑之 二年四

川飢廣安懷安軍潼川府大亡麥 出川緡八十萬令帥臣賑之 衡郴

州武岡桂陽軍乏食 三年春邵永州大飢死徙者眾

民多剽盜 令常平使者賑之粟 夏行都糶食 出豐儲倉米十萬石以賑 四年

春撫袁州隆興府臨江軍大飢殍死者不可勝瘞有舉

家二十七人同赴溺者 令郡發常平廩賑之部使者益以緡粟 開禧二

年紹興府衢婺州亡麥湖北京西淮東西郡國飢民聚

為剽盜 分命宣諭使賑恤 南康大安軍忠涪州皆飢 令部使者及守臣賑

粟 嘉定元年淮南大飢人食草木流徙江浙者百萬

人先是開禧開邊淮郡殘於兵火農久失業米斗二千

殍死者十三四炮人肉馬矢中以食詔所至郡國賑恤

歸業時邦儲亦匱郡計不支去者多死亦有為濠豐餘

虜俘掠而北者是歲行都亦飢米斗千錢 詔發廩廣糶賑糶勸分

二年春兩淮荆襄建康府大飢米斗錢數千人食草

木淮民刳道殣食盡發瘞背繼之人相搯噬流徙之聚

於揚州者數千家渡江者聚建康殍死日八九十人 詔發

廩賑施皆十萬餘石令州郡置粥院為糜以活之 是秋諸路復大歉常潤尤甚

乾隆十二年校刊

文獻通考卷三百三十一 物異七

冬行都大飢殍者橫市道多棄兒十二月甲戌令發粟賑施盡其月

三年春建康府大飢人相食五月衢州飢頗聚為剽盜

守臣孫子直平之勸分以賑七年台州大亡麥八年淮浙江東

西飢都昌縣飢民聚為盜者三十六黨自秋至於明年夏縣官出錢三百三十三萬緡粟四百八十五萬石以賑

九年行都飢間巷有殍令賑粟

十年台衢婺饒信州飢多聚為剽盜台為甚蜀石泉

軍飢殍死殆萬人皆令郡賑之十一年秋淮浙江東飢僅

無麥苗十二年春潼川府飢而不害十三年春福

州飢人食草根令郡賑之十六年春海州新附山東民飢

令海州賑之京東河北路新附山西民亦飢令楚州賑之湖

南永道州大飢令帥臣移粟以賑是歲行都江淮閩浙郡國皆

無麥禾十七年春餘杭錢塘仁和三縣飢令帥臣賑之鎮

江府飢郡為糜以賑者日千餘人真鄂州亦乏食令通商勸

地震

史紀周幽王二年周三川皆震應劭曰震地震三川竭也洛即溱沮也川自震

耳故將壅塞非地震也劉向以為金木水火沴土者也

伯陽甫曰服虔曰周太史周將亡矣天地之氣不過其序若過

其序民亂之也陽伏而不能出陰迫而不能升應劭曰

陽使不能升也於是有地震今三川實震是陽失其所而填陰

乾隆十二年校刊
文獻通考卷三百一十五 物異七

也應劭曰失其所失其道也填陰為陰使失而在陰原

必塞師古曰原謂水泉之本也原塞國必亡夫水土演而民用也應

日演引也所以引出土土無所演而民乏財用不亡何

待昔伊雒竭而夏亡河竭而商亡今周德如二代之季

其原又塞塞必竭川竭山必崩夫國必以山川山崩川

竭亡之徵也若國亡不過十年數之紀也是歲三川竭

岐山崩劉向以為陽失在陰者謂火氣來煎枯水故川

竭也山川連體下竭上崩事執然也時幽王暴虐妄誅

伐不聽諫迷於褒姒廢其正后師古曰褒姒褒人所獻之女也正后申后也蓋

白華之詩廢后之父申侯與犬戎共攻殺幽王一日其

在天文水為辰星辰星為蠻夷月食辰星國以女亡幽

王之敗女亂其內夷攻其外京房易傳曰君臣相背厥

異名水絕有名之水文公九年九月癸酉地震劉向以為

先是齊桓晉文魯僖二伯賢君新沒周襄王失道楚穆

王弑父諸侯皆不肖權傾於下天戒若曰臣下強盛者

將動為害後宋魯晉莒鄭陳齊皆弑君諸震畧皆從董

仲舒也京房易傳曰臣事雖正專必震其震於水則波

於木則搖於屋則瓦落大經在辟而易臣茲謂陰助服

日經常也辟音刑辟之辟蘇林曰大經五行之常經也

在辟眾陰犯殺其上也師古曰辟讀曰僻謂常法僻壞

而易厥震搖政宮大經搖政茲謂不陰厥震搖山山出

乾隆十二年校刊

文獻通考卷三百一 物異七

七

涌水嗣子無德專祿茲謂不順厥震動邱陵涌水出
襄公十六年五月甲子地震劉向以爲先是鷄澤之會
諸侯盟大夫又盟是歲三月諸侯爲溴梁之會而大夫
獨相與盟五月地震矣其後崔氏專齊欒盈亂晉良霄
傾鄭闞殺吳子燕逐其君楚滅陳蔡 昭公十九年五
月己卯地震劉向以爲是時季氏將有逐君之變其後
宋三臣曹會皆以地叛蔡莒逐其君吳敗中國殺二君
二十三年八月乙未地震劉向以爲是時周景王崩
劉單立王子猛尹氏立子朝其後季氏逐昭公黑肱叛
邾吳殺其君僚宋五大夫晉二大夫皆以地叛 哀公

三年四月甲午地震劉向以爲是時諸侯皆信邪臣莫
能用仲尼盜殺齊侯齊陳乞弑君 貞定王三年晉空
桐震七日臺舍皆壞人多死

秦始皇十五年地動 十七年地動自樂徐以西至平
陰臺屋墻垣大半壞

漢惠帝二年正月地震隴西厥音一甲反四百餘家 文帝

五年二月地震 景帝後元年五月地震 武帝元光

四年五月地震 征和二年八月地震壓殺人 後元

元年秋七月地震 宣帝本始四年四月壬寅地震河

南以東四十九郡北海琅邪地震壞祖宗廟城郭殺六

千餘人 地節二年九月壬申地震 元帝初元二年
二月戊午地震隴西郡毀落太上皇廟殿壁木飾壞敗
城郭宮寺民廬壓殺人衆 永光三年冬地震 成帝
建始三年地震 綏和二年九月丙辰地震自京師至
北邊郡國三十餘壞城郭凡殺四百一十五人
王莽天鳳三年二月乙酉地震

後漢世祖建武二十二年九月郡國四十二地震南陽
尤甚地裂壓殺人其後武谿蠻夷反爲寇害至南郡發
荊州諸郡兵遣武威將軍劉尚擊之爲夷所圍復發兵
赴之尚遂爲所沒 章帝建初元年三月甲申山陽東

平地地震 和帝永元四年六月丙辰郡國十三地震春

秋漢含孳曰女王盛臣制命則地動坼畔震起山崩淪
時竇太后攝政兄竇憲專權將以是受禍也後五日詔
收憲印綬兄弟就國逼迫皆自殺 五年二月戊午隴

西地震先儒說民安土者也將大動行大震九月匈奴
單于於除難鞬叛遣使發邊郡兵討之 七年九月癸

卯京都地震儒說闔官無陽施猶婦人也是時和帝與
中常侍鄭衆謀奪竇氏權德之因任用之及幸常侍蔡

倫二人始並用權 九年三月庚辰隴西地震閏月塞
外羌犯塞殺畧吏民使征西將軍劉尚擊之 安帝永

初元年郡國十八地震李固曰地者陰也法當安靜今
乃越陰之職專陽之政故應以震動是時鄧太后攝政
專事訖建光中太后崩安帝乃得制政於是陰類並勝
西羌亂夏連十餘年 二年郡國十二地震 三年十
二月辛酉郡國九地震 四年三月癸巳郡國四地震
五年正月丙戌郡國十地震 七年正月壬寅二月
丙午郡國十八地震 元初元年郡國十五地震 二
年十一月庚申郡國十地震 三年二月郡國十地震
十一月癸卯郡國九地震 四年郡國十三地震 五
年郡國十四地震 六年二月乙巳京都郡國四十二

地震或地坼裂涌水壞敗城郭民室屋壓人冬郡國八
地震 永寧元年郡國二十三地震 建元元年九月
己丑郡國三十五地震或地坼裂壞城郭室屋壓殺人
是時安帝不能明察信宮人及阿母聖等讒云破壞鄧
太后家於是專聽信聖及宦者中常侍江京樊豐等皆
得用權 延光元年七月癸卯京都郡國十三地震三
月戊申郡國二十七地震 二年京都郡國三十二地
震 三年京都郡國二十三地震是時以讒免太尉楊
震廢太子 四年十月丁巳京都郡國十六地震時安
帝既崩閻太后攝政弟兄閻顯等並用事遂斥安帝子

更徵諸國王子未至中黃門遂誅顯兄弟 順帝永建三年正月丙子京都漢陽地震漢陽屋壞殺人地坼涌水出是時順帝阿母宋娥及中常侍張昉等用權 陽嘉二年四月己亥京都地震是時爵號宋娥爲山陽君 四年十二月甲寅京都地震 永和二年四月庚申京都地震是時宋娥構姦誣罔五月事覺收印綬歸田里十一月丁卯京都地震是時太尉王龔以中常侍張昉等專弄國權欲奏誅之時龔宗親有以楊震行事諫之止云 三年二月乙亥京都金城隴西地震裂城郭室屋多壞壓殺人閏月己酉京都地震十月西羌二千

餘騎入金城塞爲涼州害 四年三月乙亥京都地震

五年二月戊申京都地震 建康元年正月涼州都

郡六地震從去年九月以來至四月凡百八十日震山

谷坼裂壞敗城寺傷害人物三月護羌校尉趙冲爲叛

胡所殺九月丙午京都地震是時順帝崩梁太后攝政

欲爲順帝作陵制度奢廣多壞吏民冢尚書樂巴諫事

太后怒癸卯詔書收巴下獄欲殺之丙午地震於是太

后乃出巴免爲庶人 桓帝建和元年四月庚寅京都

地震九月丁卯京都地震是時梁太后攝政兄冀持權

至和平元年太后崩然冀猶秉政專事至延熹二年乃

誅滅 三年九月己卯地震庚寅又震 元嘉元年十一月辛巳京都地震 二年正月丙辰京都地震十月乙亥京都地震 永興二年二月癸卯京都地震 永壽二年十二月京都地震 延熹四年京都右扶風涼州地震 五年五月乙亥京都地震是時桓帝與中常侍單超等謀誅除梁冀聽之並使用事專權又鄧后本小人性行無常苟有顏色立以爲后後卒坐執左道廢以憂死 八年九月丁未京都地震 靈帝建寧四年二月癸卯地震是時中常侍曹節王甫等皆專權 熹平二年六月地震 六年十月辛丑地震 光和元年

二月辛未地震四月丙辰地震靈帝時宦者專恣 二年三月京兆地震 三年自秋至明年春酒泉表氏地八十餘動涌水出城中官寺民舍皆傾縣易處更築城郭 獻帝初平二年六月丙戌地震 興平元年六月丁丑地震 後主炎興二年蜀地震時宦人黃皓專權按司馬彪說闡宦無陽施猶婦人也皓見任之應與漢和帝時同事也是冬蜀亡

魏明帝青龍二年十一月京都地震從東來隱隱有聲搖屋瓦 景初元年六月戊申京都地震是秋吳將朱然圍江夏荊州刺史胡質擊退之又公孫淵叛自立爲

燕王改元置百官明年討平之縣公諡曰子曹嗣廢帝
齊王正始二年十一月南安郡地震 三年七月甲申
南安郡地震十二月魏郡地震 六年二月丁卯南安
郡地震時曹爽專政遷太后於永寧宮后與帝泣別連
年地震是其應也

吳孫權黃武四年江東地連震時權受魏爵命爲大將
軍吳王而改元專制不修臣迹京房易傳曰臣事雖正
專必震劉向云臣下強盛將動而爲害之應也 嘉禾
六年五月江東地震 赤烏二年正月地再震時呂壹
專事步騭上疏以爲臣下專政之應 赤烏十一年二

月江東地仍震時權聽讒尋黜朱據廢太子

晉武帝泰始五年四月辛酉地震是年冬新平氏羌叛

明年孫皓遣大衆入渦音口 七年六月景申地震

咸寧二年八月庚辰河南河東平陽地震 四年六月

丁未陰平廣武地震甲子又震 太康二年二月庚申

淮南丹陽地震 五年三月朔壬辰京師地震 六年

七月己丑地震 七年七月南安其焉爲地震八月

京兆地震 八年五月壬子建安地震七月陰平地地震

八月丹陽地震 九年正月會稽丹陽吳興地震四月

辛酉長沙南海等郡國八地震七月至於八月地又四

震其三有聲如雷九月臨賀地震十二月又震 十年十二月已亥丹陽地震 太熙元年正月地又震武帝世始於賈充終於楊駿阿黨昧利苟竊朝權至於末年所任轉弊故頻年地震過其序也終喪天下 惠帝元康元年十二月辛酉京師地震此夏賈后使楚王瑋殺汝南王亮及太保衛瓘此陰道盛陽道微故也 四年二月上谷上庸遼東地震五月蜀郡山移淮南壽春洪水出山崩地陷壞城府八月上谷地震水出殺百餘人十月京都地震十一月滎陽襄城汝陰梁國南陽地皆震十二月京都又震是時賈后亂朝終至禍敗之應也

漢鄧太后攝政時郡國地震李固以爲地陰也法當安靜今乃越陰之職專陽之政故應以震此同事也京房易傳曰小人剝廬厥妖山崩茲謂陰乘陽弱勝彊又曰陰背陽則地裂父子分離夷羌叛去 元康五年五月丁丑地震六月金城地震 六年正月丁丑地震 八年正月庚辰地震 太安元年十二月地震時齊王冏專政之應也 二年十二月庚辰地震是時長沙王又專政之應也 孝懷帝永嘉三年十月荆襄二州地震時司馬越專政 四年四月兗州地震五月石勒寇汲郡執太守胡寵遂南濟沔是其應也 愍帝建興二年

乾隆十二年校刊

文獻通考卷三百 物異七

四月甲辰地震 三年六月丁卯長安又震時主幼權
傾於下四方雲擾兵亂不息之應也 元帝太興元年
四月西平地地震湧出水十二月廬陵豫章武昌西陵地
震涌水出山崩于寶以爲王敦陵上之應也 二年五
月己丑祁山地震山崩殺人是時相國南陽王保在祁
山稱晉王不終之象也 三年四月庚寅丹陽吳郡晉
陵又地震 成帝咸和二年二月江陵地震三月益州
地震四月己未豫州地震是年蘇峻作亂 九年三月
丁酉會稽地震 穆帝永和元年六月癸亥地震是時
嗣主幼冲母后稱制政在臣下所以連年地震 二年

十二月地震 三年正月庚辰地震九月又地震 四
年十月己未地震 五年正月庚寅地震是時石季龍
僭卽皇帝位亦過其序也 九年八月丁酉京都地震
有聲如雷 十年正月丁卯地震聲如雷鷄雉皆鳴响
呼后 十一年四月乙酉地震五月丁未地震 升平
二年十一月辛酉地震 五年八月涼州地震 哀帝
隆和元年四月甲戌地震是時政在將相人主南面而
已 興寧元年四月甲戌揚州地震湖瀆溢 二年三
月庚寅江陵地震是時桓温專政 海西公太和元年
二月涼州地震水涌是海西將廢之應也 簡文帝咸

安二年十月辛未安成地震是年帝崩 孝武帝寧康元年十月辛未地震 二年二月丁巳地震七月甲午涼州地又震山崩是時嗣主幼冲權在將相陰盛之應也 太元二年閏三月壬午地震五月丁丑地震 十一年六月巳卯地震是後緣河諸將連歲兵役人勞之應也 十五年三月巳酉朔夜地震八月京都地震十二月巳未地震 十七年六月癸卯地震十二月巳未地又震是時羣小弄權天下側目 十八年正月癸亥朔地震二月乙未夜地震 安帝隆安四年四月乙未地震九月癸丑地震是時幼主冲昧政在臣下 義熙

四年正月壬子夜地震有聲十月癸亥地震 五年正月戊戌夜潯陽地震有聲如雷明年盧循下 八年自正月至四月南康廬陵地四震明年王旅西討荆益 十年三月戊寅地震 宋武帝永初元年秋七月巳巳地震 文帝元嘉十二年夏四月都下地震 十五年七月辛未地震 孝武大明二年四月辛丑地震 六年七月甲申地震有聲如雷兗州尤甚魯郡山搖者二 後廢帝元徽五年五月地震

齊東昏侯永元元年七月地震至來歲晝夜不止小屋

乾隆十二年校刊

文獻通考卷三百 物異七

七

多壞

梁武帝天監五年十二月京師地震京房易飛候曰地
動以下十一月者其邑飢亡時交州刺史李凱反明年
霜歲儉人飢 普通三年正月建康地震時義州刺史
文僧朗以州叛 六年十二月地震京房易飛候曰地
冬動有音以十二月者其邑有行兵是時帝令豫章王
琮將兵北伐 建中大通五年正月建康地震京房易
飛候曰地以春動歲不昌是歲大水百姓飢饉 大同
三年十一月建康地震京房易飛候曰地震以十一月
邑有大喪及飢亡明年霜爲災百姓饑 五年十月建

康地震是歲會稽山賊起 七年二月建康地震是歲
交州人李賁舉兵逐刺史蕭諮 九年閏正月地震李
賁自稱皇帝署置百官 太清三年四月建康地再震
時侯景自爲大丞相錄尚書事帝所須不給是月以憂
憤崩

陳永定二年五月建康地震時王琳立蕭莊於郢州
太建四年十一月地震陳寶應反閩中 禎明元年正
月地震施文慶沈客卿專恣之應也

後齊河清二年并州地震和士開專恣之應

後周建德二年涼州地頻震城郭多壞時羌夷叛

隋文帝開皇十四年五月京師地震京房易飛候曰地
動以夏五月人流亡是歲關中饑百姓就糧於關東
二十年十一月戊子立晉王廣爲皇太子是日天下地
震 仁壽二年四月岐雍地震易飛候曰震以四月五
穀不熟人大饑

唐武德二年十月乙未京師地震陰盛而反常則地震
故其占爲臣強爲后妃專恣爲夷犯華爲小人道長爲
寇至爲叛臣 七年七月雋州地震山摧壅江水噎流

貞觀七年十月乙丑京師地震 十二年正月壬寅
松叢二州地震壞廬舍 二十年九月辛亥靈州地震

有聲如雷 二十三年八月癸酉朔河東地震晉州尤
甚壓殺五十餘人乙亥又震十一月乙丑又震 永徽
元年四月己巳朔晉州地震己卯又震六月庚辰又震
有聲如雷 二年十月又震十一月戊寅定襄地震帝
始封晉王初卽位而地屢震天下將由帝而動搖象也

儀鳳二年三月庚辰京師地震 永淳元年十月甲
子京師地震 垂拱三年十月乙亥京師地震 四年
七月戊午又震八月戊戌神都地震 延載元年四月
壬戌常州地震 大足元年七月乙亥揚楚常潤蘇五
州地震 二年八月辛亥劔南六州地震 景龍四年

五月丁丑剡縣地震 景雲三年正月甲戌并汾絳三州地震壞廬舍壓死百餘人 開元二十二年二月壬寅秦州地震西北隱隱有聲圻而復合經時不止壞廬舍殆盡壓死四千餘人 二十六年三月癸巳京師地震 至德元載十一月辛亥朔河西地震裂有聲陷廬舍張掖酒泉尤甚至二載三月癸亥乃止 大歷二年十一月壬申京師地震自東北來有聲如雷者三 三年五月丙戌又震 十二年恒定二州地大震三日乃止東鹿寧晉地裂數丈沙石隨水流出平地壞廬舍壓死數百人 建中元年四月巳亥京師地震 三年六

月甲子又震 四年四月甲子又震五月辛巳又震

貞元二年五月巳酉又震 三年十一月丁丑夜京師

東都蒲陝地震 四年正月庚戌朔夜京師地震辛亥

壬子丁卯戊辰庚午癸酉甲戌乙亥皆震金房二州尤

甚江溢山裂屋宇多壞人皆露處二月壬午京師又震

甲申乙酉丙申三月甲寅巳未庚午辛未五月丙寅丁

卯皆震 八年甲午又震有聲如雷甲辰又震 九年

四月辛酉又震有聲如雷河中關輔尤甚壞城壁廬舍

地裂水涌 十年四月戊申京師地震癸丑又震侍中

渾瑊第有樹湧出樹枝皆載蚯蚓 十三年七月乙未

又震 元和七年八月京師地震草樹皆搖 九年三月丙辰雋州地震晝夜八十壓死百餘人地陷者三十里 十年十月京師地震 十一年二月丁丑又震 十五年正月穆宗卽位戊辰始朝羣臣於宣政殿是夜地震 太和二年正月壬申地震 七年六月甲戌又震 九年三月乙卯京師地震屋瓦皆墜戶牖間有聲 開成元年二月乙亥又震 二年十一月乙丑夜又震 四年十一月甲戌又震 會昌二年正月癸亥宋亳二州地震十二月癸未京師地震 大中三年十月辛已上都及振武河西天德靈武塩夏等州地震壞廬

舍壓死數十人 十二年八月丁巳太原地震 咸通元年五月上都地震 六年十二月晉絳二州地震壞廬舍地裂泉湧泥出青色 八年正月丁未河中晉絳三州地大震壞廬舍人有死者 十三年四月庚子朔浙東西地震 乾符三年六月乙丑雄州地震至七月辛已止州城廬舍盡壞地陷水涌傷死甚衆是月濮州地震十二月京師地震有聲 四年六月庚寅雄州地震 六年二月京師地震有聲如雷藍田山裂水涌 中和三年秋晉州地震有聲如雷 光啓二年春城都地震月中十數占曰兵饑十二月魏州地震 乾寧二

年三月庚午河東地震

宋乾德三年京師地震 至道二年十月潼關西靈夏

環慶等州地震城郭廬舍多壞占云兵饑是時西戎寇靈州明年遣將率兵援糧以救之關西民有饑殍者

咸平二年九月常州地震壞鼓角樓羅務軍民廬舍甚衆 四年九月慶州地震者再 六年正月益州地震

景德元年正月丙申夜京師地震癸卯夜復震丁未夜又震屋宇皆動有聲移時方止癸丑冀州地震占主土工興有急令兵革興是年契丹犯塞二月益黎雅州地震三月邢州地震不止四月己卯夜瀛州地震五月

邢州地震復震不止十一月壬子日南至京師地震癸丑

石州地震 四年七月丙戌益州地震己丑渭州瓦亭

寨地震者四 大中祥符二年三月代州地震 四年

六月昌眉州並地震七月真定府震壞城壘 天聖五

年三月戊辰秦州地震 七年十月丙午京師地震

景祐四年十二月甲申忻代并三州地震壞廬舍覆壓吏民忻州死者萬九千七百四十二人傷者五千六百

五十五人畜死者五萬餘代州死者七百五十九人并

州千八百九十人 寶元元年正月庚申并忻代州地

震十一月忻州地震十二月甲子京師地震 慶歷三

年五月乙亥忻州地大震說者曰地道貴靜今數震搖
兵興民勞之象也五月庚午忻州地震西北有聲如雷
五年七月丁酉廣州地震已卯京南岳州並地震
六年二月戊寅青州地震三月庚寅登州地震距嶗山
摧自是震不已每震卽海底有聲如雷五月甲申京師
地震 七年十月乙丑河陽許州地震 二年十一月
丁酉夜秀州地震有聲自西北起如雷 嘉祐二年雄
霸等州地震 五年五月己丑京師地震 治平四年
秋漳泉建州邵武興化軍等處皆地震潮州尤甚地裂
泉涌壓覆州郭及兩縣屋宇士民軍兵死者甚衆八月

己巳京師地震 熙寧元年七月甲申地震乙酉辛卯
再震八月壬寅甲辰又震是月鄆州須城東阿二縣地
震終日滄州清池莫州亦震壞官私廬舍城壁是時河
北復大震或數刻不止有聲如雷樓櫓民居多摧覆壓
死者甚衆九月戊子莫州地震有聲如雷十一月乙未
京師及莫州地震十二月癸卯瀛州地大震丁巳冀州
地震辛酉滄州地震涌出沙泥船板胡桃螺蚌甲之屬
十二月潮州地再震是歲數路地震有一日十數震有
踰半年震不止者 元豐八年五月京師地震 元祐
二年二月辛亥代州地震有聲 四年春陝西河北震

七年九月己酉蘭州鎮戎軍永興軍地震十月庚戌朔環州地再震 紹聖元年十一月丙寅太原府地震 二年十月十一月河南府地震是歲蘇州自夏迄秋地震 三年三月戊戌夜劔南東川地震九月己酉滁州沂州地震 四年六月己酉太原府地震有聲 元符元年七月壬申夜雲露蔽天地震良久 三年正月壬申恩州地震八月甲戌太原府地震 三年五月己巳太原府又震 建中靖國元年十二月辛亥太原府潞晉隰代石嵐等州岢嵐威勝保化寧化軍地震彌旬晝夜不止壞城壁屋宇人畜多死 宣和四年北方用

兵雄州地震

六年正月京師連日再地震宮殿門皆

動有聲

建炎二年正月戊戌長安地大震金虜將婁

宿圍城彌旬無外援虜兵乘地震而入城遂陷

紹興

三年八月甲申地震平江府湖州尤甚

甲辰詔罪已求直言

是歲

逆豫陷鄧隨等州金虜犯蜀臣犯君夷犯華之應也

六年六月乙巳夜地震有聲自西北如雷餘杭縣爲甚

詔罪已求直言

是冬僞齊劉麟猊犯順寇濠壽州後四年虜酋

兀术入寇

二十四年正月戊寅地震 二十五年三

月壬申又震

二十八年八月甲寅地夜震 三十一

年三月壬辰又震

三十二年七月戊申又震 隆興

元年十月丁丑地震六月甲寅又震是歲宰臣湯思退
 擅撤海泗唐鄧之戍虜乘邊虛入寇後思退貶死此臣
 專必震又兵役人勞之應也 乾道二年九月丙午地
 震自西北方是月台州有海寇 四年十二月壬子石
 泉軍地震三日有聲如雷屋瓦皆落時郡有綿州冤獄
 云 淳熙元年十二月戊辰地震自東北方後湖南江
 西茶寇擾數路 九年十二月壬寅地夜震 十年十
 二月丙寅又震 十二年五月庚寅又震 慶元六年
 十一月甲子地震東北方 嘉定六年四月行都地震
 六月丙子嚴州淳安縣地震 十年二月庚申地震自

東南越月虜犯光州 十四年正月乙未地夜震大雷
 是春金虜入寇斬黃州失守

文獻通考卷第三百一

文獻通考卷第三百一

鄱 陽 馬 端 臨 貴 與 著

物異考八

山崩 地陷 地移 地長 川竭

春秋釐公十四年秋八月辛卯沙麓崩穀梁傳曰林屬

於山曰麓師古曰屬聯也音之欲反沙其名也劉向以為臣下背叛

散落不事上之象也先是齊桓行伯道會諸侯師古曰伯讀曰

霸其下亦同事周室管仲既死桓德日衰天戒若曰伯道將

廢諸侯散落政逮大夫陪臣執命臣下不事上矣桓公

不寤天子蔽晦師古曰被掩蔽而暗也及齊桓死天下散而從楚

乾隆十二年校刊

文獻通考卷第三百一 物異八

王札子殺二大夫

師古曰二大夫召伯毛伯也

晉敗天子之師

師古曰謂

敗之於貿戎也

已解於上也 莫能征討從是陵遲公羊以為沙麓河

上邑也董仲舒說畧同一曰河大川象齊大國桓德衰

伯道將移於晉文故河為徙也左氏以為沙麓晉地沙

山名也地震而麓崩不書震舉重者也伯陽甫所謂國

必依山川山崩川竭亡之徵也不過十年數之紀也至

二十四年晉懷公殺於高粱

師古曰懷公謂子圉惠公之子也文公入國而使殺

之高梁

京房易傳曰小人剝廬

師古曰剝卦上九爻之辭

厥妖山崩

茲謂陰乘陽弱勝強 成公五年夏梁山崩穀梁傳曰

靡河三日不流

師古曰靡讀曰壅

晉君帥羣臣而哭之廼流

師古

曰從伯宗用輦者之言

劉向以為山陽君也水陰民也天戒若曰

君道崩壞下亂百姓將失其所矣哭然後流喪亡象也

梁山在晉地自晉始而及天下也後晉暴三卿厲公以

殺董仲舒說畧同劉歆以為梁山晉望也崩弛崩也古

者三代命祀祭不越望吉凶禍福不是過也國主山川

山崩川竭亡之徵也美惡周必復是歲歲在鶉火至十

七年復在鶉火欒書中行偃弒厲公而立悼公

威烈王十三年晉河岸崩壅龍門至於底柱

漢高后二年正月武都山崩殺七百六十人地震至八

月廼止 文帝二年四月齊楚地山二十九所同日俱

乾隆十二年校刊

文獻通考卷三百三十三 物異八

二

大發水潰出劉向以為近水沴土也天戒若曰勿盛齊楚之君今失制度將為亂後十六年帝庶兄齊悼惠王之孫文王則薨無子帝分齊地立悼惠王庶子六人皆為王師古曰謂齊孝王將閭濟北王志菑川王賢膠東王雄渠膠西王卬濟南王辟光賈誼鼂錯諫以為違古制恐為亂至景帝三年齊楚七國起兵百餘萬漢皆破之春秋四國同日災師古曰宋衛陳鄭漢七國同日眾山潰咸被其害不畏天威之明效也成帝河平三年二月丙戌犍為柏江山崩捐江山崩皆靡江水師古曰靡讀曰壅次下亦同江水逆流壞城殺十三人地震積二十一日百二十四動元延三年正月丙寅蜀郡岷山崩

靡江水逆流三日廼通劉向以為周時岐山崩三川竭而幽王亡岐山者周所興也漢家本起於蜀漢今所起之地山崩川竭星孛又及攝提大角從參至辰如淳曰長及攝提大角始發於參至辰也殆必亡矣其後三世亡嗣王莽篡位王莽天鳳三年長平館西岸崩靡涇水不流毀而北行

後漢和帝永元元年七月會稽南山崩會稽南方大名山也京房易傳曰山崩陰乘陽弱勝強也劉向以為山陽君也水陰民也君道崩壞百姓失所也劉歆以為崩猶地也是時竇太后攝政兄竇憲專權七年七月趙

國易陽地裂京房易傳曰地裂者臣下分離不肯相從也是時南單于衆乖離漢軍追討十二年夏四月戊辰南郡秭歸山高四百丈崩填谿殺百餘人明年冬至蠻夷反遣使募荊州吏民萬餘人擊之元興元年五月癸酉右扶風雍地裂是後西羌大寇涼州殤帝延平元年五月壬辰河東恒山崩是時鄧太后專政秋八月殤帝崩安帝永初元年六月丁巳河東楊地陷東西百四十步南北百二十步深三丈五尺六年六月壬辰豫章員谿原山崩各六十三所元初元年三月己卯日南地坼長百八十二里其後三年正月蒼梧鬱

林合浦盜賊羣起劫畧吏民二年六月河南雒陽新城地裂延光二年七月丹陽山崩四十七所三年六月庚午巴郡閬中山崩四年十月丙午蜀郡越雋山崩殺四百餘人丙午天子會日也是時閻太后攝政其十一月中黃門孫程等殺江京立順帝誅閻后兄弟明年閻后崩順帝陽嘉二年六月丁丑雒陽宣德亭地坼長八十五丈近郊地時李固對策以爲陰類專恣將有分離之象所以附郊城者是上帝示象以誠陛下也是時宋娥及中常侍各用權分爭後中常侍張逵豫政與大將軍商爭權爲商作飛語欲陷之桓帝建和

三年四月郡國六地裂水湧出井溢壞寺屋殺人時梁
太后攝政兄冀枉殺李固杜喬 三年郡國五山崩
和平元年七月廣漢梓潼山崩 永興二年六月東海
胸山崩冬十二月泰山瑯邪盜賊羣起 永壽二年七
月河東地裂時梁皇后兄冀秉政桓帝欲自由內患之
延熹元年七月乙巳左馮翊雲陽地裂 三年五月
戊申漢中山崩是時上寵恣中常侍單超等 四年六
月庚子泰山博尤來山判解 八年六月丙辰緱氏地
裂 永康元年五月丙午雒陽高平永壽亭上黨泣元工
反氏地各裂是時朝臣患中常侍王甫等專恣冬桓帝

崩明年竇氏等欲誅常侍黃門不果更爲所誅 靈帝
建寧四年五月河東地裂十二處裂各長十里百七十
步廣者三十餘步深不見底

魏元帝咸熙二年二月太行山崩此魏亡之徵也其冬
晉有天下

吳孫權赤烏十三年八月丹陽句容及故鄣寧國諸山
崩鴻水溢劉歆以爲國主山川山崩川竭亡之徵也吳
雖稱帝其實列國災發丹陽天意見之後二年而權薨
又二十六年而吳亡

晉武帝泰始三年三月戊午太石山崩 四年七月泰

山崩墜三里京房易傳曰自上下者爲崩厥應泰山之石顛而下聖人受命人君虜及帝晏駕而祿去王室惠皇懦弱懷愍二帝俱辱虜庭淪胥於北元帝中興於南此其應也 太康五年庚午宣帝廟地陷 六年十月南安新興山崩湧水出 七年二月朱提_{殊匙二音}之大瀘山崩震壞郡舍陰平之仇池崖隕 八年七月大雨殿前地陷方五尺深數丈中有破船 惠帝元康四年蜀郡山崩殺人五月壬子壽春山崩洪水出城壞地陷方三十丈殺人六月壽春大雷山崩地坼人家陷死上庸郡亦如之八月居庸地裂廣三十六丈長八十四丈水

出大饑上庸四處山崩地墜廣三十丈長一百三十丈水出殺人皆賈后亂朝之應也 太安元年四月西壩

崩 懷帝永嘉元年三月洛陽東北步廣里地陷 二

年八月乙亥鄆城無故自壞七十餘丈司馬越惡之遷於濮陽此見沴之異也越卒以陵上受禍 三年七月

戊辰當陽地裂三所廣三丈長三百餘步京房易傳曰地坼裂者臣下分離不肯相從也其後司馬越苟晞交惡四方牧伯莫不離散王室遂亡 三年十月宜都夷

道山崩 四年四月湘東鄆黑石山崩 元帝太興元年二月廬陵豫章武昌西陽地震山崩 二年五月祁

山地震山崩殺人 三年南平郡山崩出雄黃數千斤

時王敦陵傲帝優容之示含養禍萌也 四年八月常

山崩水出滹沱 上火乎反 下音陀 盈溢大木傾拔 成帝咸和

四年十月柴桑廬山西北崖崩十二月劉允為郭默所

殺 穆帝永和七年九月峻平崇陽二陵崩 十二年

十一月遣散騎常侍車灌修峻平陵開埏道崩壓殺數

十人 升平五年二月南掖門馬足陷地得鐘一有文

四字 哀帝隆和元年四月丁丑浩臺 上古合反 下音門 山崩

張天錫亡徵也 安帝義熙八年三月壬寅山陰地陷

方四丈有聲如雷 十年五月戊寅西明門地穿涌水

出毀門扇及陷此水沴土也 十一年五月霍山崩出

銅鐘六枚 十三年七月漢中城固縣水涯有聲若雷

既而岸崩出銅鐘十有二枚 惠帝元康九年六月夜

暴雨雨賈謐齋屋柱陷入地壓謐牀帳此木沴土土失

其性不能載也明年謐誅焉 光熙元年五月范陽國

地燃可以爨此火沴土也是時禮樂征伐自諸侯出

梁武帝普通二年始平郡石鼓村地自開成井方六丈

六尺深三十二丈

後魏孝靜帝武定二年十一月西河地陷有火出京房

易傳占曰地自陷其君亡祖暉曰火陽精也地陰主也

地燃越陰之道行陽之政臣下專恣終以自害時齊神武作宰侯景專擅河南神武崩景作亂

後周武帝建德二年涼州地震裂出泉

隋高祖仁壽三年梁州就谷山崩洪範五行傳曰崩散落背叛不事上之類也梁州爲漢地明年漢王諒反

煬帝大業七年砥柱山崩壅河逆流數十里時帝興遼東之役四海怨叛卒以滅亡

唐太宗貞觀八年七月隴右山摧山者高峻自上而隕之象也 武后垂拱二年九月己巳雍州新豐縣露臺鄉大風雨震電有山湧出高一十丈有池周三百畝池

中有龍鳳之形禾麥之異武后以爲休應名曰慶山荆

州人俞文俊上言天氣不和而寒暑隔人氣不和而贅

疣生地氣不和而堆阜出今陛下以女主居陽位反易

剛柔故地氣隔塞山變爲災陛下以爲慶山臣以爲非

慶也宜側身修德以答天譴不然恐災禍至后怒流於

嶺南 永昌中華州赤水南岸大山晝日忽風昏有聲

隱隱如雷頃之漸移東數百步壅赤水壓張村民三十

餘家高二百餘丈水深三十丈坡上草木宛然金滕曰

山徙者人君不用道祿去公室賞罰不由君佞人執政

政在女主不出五年有走王 元宗開元十七年四月

乙亥大風震電藍田山摧裂百餘步畿內山也國主山
川山摧川竭亡之證也占曰人君德消政易則然 天
寶十一載六月虢州閬鄉黃河中女媧墓因大雨晦冥
失所在至肅宗乾元二年六月乙未瀕河人聞有風雷
曉見其墓湧出下有巨石上有雙柳各長丈餘時號風
陵堆占曰塚墓自移天下破 代宗大歷六年四月戊
寅藍田西原地陷 九年十一月戊戌同州夏陽有山
徙於河上聲如雷 十二年郴州黃岑山摧壓死者數
百人 德宗建中二年霍山裂魏州魏縣西四十里地
數畝忽長崇數尺 憲宗元和八年五月丁丑大隗山

摧 十五年七月丁未苑中土山摧壓死二十人 僖
宗光啓三年四月維州山崩累日不止塵坌亘天壅江
水逆流占曰國破

後唐明宗長興三年七月夔州奏赤甲山崩

宋太宗雍熙三年階州福清縣青龍峽山圯壅白江水
逆流高十丈許壞民田數百里 淳化三年五月雅州

名山縣大風雨登遼山圯壅江水逆流入民田壞稼

真宗咸平元年七月庚午寧化軍汾水漲壞北水門山

石摧圯軍士有壓死者 二年七月庚寅陝州靈寶縣

暴雨崖圯壓居民死者二十二戶 三年三月辛丑夜

秦州大澤縣三陽寨大雨崖摧壓死者六十二人 四年正月秦州成紀縣山摧壓死六十餘人 景德四年七月秦州成紀縣崖圯殺居民 天禧五年五月襄州鳳林鎮道側湧起高三尺許長三丈闊八尺知州夏竦以聞 神宗熙寧元年潭州益陽縣雷震山裂出米二年十月庚戌南郊東壘門內地陷有天寶十二載古墓 五年九月丙寅華州少華山前阜頭峯越八盤嶺及谷摧陷於石子坡東西五里南北十里潰散墳裂湧起堆阜各高數丈長若隄岸至陷居民六社凡數百戶林木廬舍亦無存者並山之民言數年以來峯上常有

聲是夜初昏畧無風雨山上忽霧起有聲漸大地遂震動不及食頃而山摧 元豐八年二月甲戌賓州嶺方縣地陷 哲宗元祐元年十二月華州鄭縣界小敷谷山頽傷居民 徽宗宣和七年七月己亥熙河路地震有裂數十丈者蘭州尤甚陷數百家倉庫俱沒 高宗紹興十二年十二月陝西不雨五穀焦枯涇渭灞滻皆竭伯陽甫曰國必依山山川摧川竭亡之證也時秦民以餓離散壯者爲北人所買郡邑遂空劉向以爲陽失在陰者謂火氣來煎枯水故川竭山川連體下竭上必摧占曰君德消政易則然京房易傳曰君臣相背厥異

名水絕 光宗紹熙四年秋南岳祝融峯有山自摧劍門關山摧 五年十二月臨安府南高峯有山自摧 寧宗慶元二年六月辛未台州黃岩縣大雨水有山自徙五十里餘聲如雷草木塚墓皆如初而故址爲淵潭時臨海縣清潭山亦自移唐志載金滕曰山徙者君不用道祿去公室賞罰不由君佞人執政也此韓侂胄擅朝之應 嘉泰二年七月丁未閩建安縣山摧民廬之壓者六十餘家 嘉定六年六月丙子浙淳安縣長樂鄉山摧水湧近水沙土也京房易傳曰小人剝廬厥妖山摧劉向以爲山陽君也水陰民也君道壞下亂百姓

將失其所又曰臣下叛散落不事上之象也 八年五月行都久不雨百川皆竭淮甸亦如之

地生異物

魏公孫淵時襄平北市生肉長圍各數尺有頭目口喙無手足 詳見赤祥門

晉惠帝元康五年呂縣有流血百餘步 詳見赤祥門 懷帝

永嘉元年洛陽地陷有蒼白鵝出 詳見羽蟲之異 元帝太興

二年廬江潯縣何旭家忽聞地中有犬子聲掘之得一

母犬與二子一雄一雌 詳見犬禍門 又孫無終家地坼得狗

同上並見 成帝咸康初地生毛 孝武帝太元二年

乾隆十二年校刊

文獻通考卷三百三十五 物異八

地生毛 十四年京都地生毛 十七年地生毛 安
帝隆安四年地生毛或白或黑 元興三年五月江陵
地生毛 義熙三年十三年地並生毛

齊高帝建元元年荆州天井湖出綿人用與常綿不異
梁武帝大同二年地生白毛長二尺 詳見白
祥門

北齊武成河清元年九月滄州及長城下地多生毛或
白或黑長四五寸

唐武后垂拱元年九月淮南地生毛或白或蒼長者尺
餘遍居人牀下揚州尤甚大如馬鬣焚之臭如燎毛占
口兵起民不安 三年魏州地出鐵如船數十丈武威

郡石化爲麵貧乏者取以給食 元宗天寶十三載汝
州葉縣南有土塊鬪中有血出數日不止 德宗建中
四年四月京師地生毛或黃或白有長尺餘者 貞元
四年四月淮南及河南地生毛 文宗太和二年六月
蘇州地生毛 四年石生麵貧者食之

宋神宗熙寧元年潭州益陽縣雷震山裂出米可十萬
斛炊之成飯而腥不可食至京師信米也但色黑如炭

八年杭州鹽官縣自三月地產物如珠可食 詳見穀
異門
元豐三年青州臨朐益都石化爲麵民取食之

黃胄黃祥

乾隆十二年校刊

文獻通考卷三百三十三 物異八

七

漢昭帝元鳳元年九月燕有黃鼠銜其尾舞王宮端門
中見鼠妖門成帝建始元年四月辛丑夜西北有火光壬
寅晨大風從西北起雲氣赤黃四塞天下終日夜著地
者黃土塵也是歲帝元舅大司馬大將軍王鳳始用事
又封鳳母弟崇庶弟譚等五人皆爲列侯哀帝卽位封
外屬丁氏傅氏周氏鄭氏凡六人爲列侯楊宣對曰五
侯封日天氣赤黃丁傅復然此殆爵土過制傷亂土氣
之祥也京房易傳曰易稱觀其生言大臣之義當觀賢
人知其性行推而貢之否則爲聞善不與茲謂不知厥
異黃厥咎聾厥災不嗣黃者日上黃光不散如火然有

黃濁氣四塞天下蔽賢絕道故災異至絕世也

王莽天鳳元年六月黃霧四塞

後漢昭烈章武二年東伐二月自秭歸進屯夷陵六月
秭歸有黃氣見長十餘里廣數十丈後踰旬爲陸遜所
破近黃祥也

晉惠帝元康四年正月大霧帝時昏眊政非已出故有
大霧之妖 元帝太興四年八月黃霧四塞埃氛蔽天
永昌元年十月京師大霧黑氣貫天日無光 明帝

太寧元年正月癸巳黃霧四塞二月又黃霧四塞是時
王敦擅權謀逆愈甚 穆帝永和七年三月涼州大風

拔木黃霧下塵是時張重華納譖出謝艾爲酒泉太守而所任非其人至九年死嗣子見殺是其應也京房易傳曰聞善不與茲謂不知厥異黃厥咎聾厥災不嗣黃者有黃濁氣四塞天下蔽賢絕道故災至絕世也 孝武太元八年二月癸未黃霧四塞是時道子專政親近佞人朝綱方替 安帝元興元年十月庚申朔黃霧昏濁不雨是時桓元謀逆之應 義熙五年十一月大霧十年十一月又大霧是時帝室衰微臣下權盛兵及土地畧非君有此其應也

宋文帝元嘉二十九年十二月戊辰黃霧四塞次年春

元凶劭弑逆

齊武帝永明六年十一月丙戌土氣竟天如烟入人眼鼻三日乃止 八年六月丙申大雷雨有黃光竟天照地狀如金

梁武帝大同元年天雨土 二年天雨灰其色黃近黃祥也京房易飛候曰聞善不與茲謂不知厥異黃厥咎聾厥災不嗣蔽賢絕道之咎也時帝自以爲聰明博達惡人勝己又篤信佛法捨身爲奴絕道蔽賢之罰也

簡文帝大寶元年正月天雨黃沙 三年夢丸土而吞之帝尋爲侯景所廢以土囊壓之而斃諸子遇害不嗣

之應也

陳後主時夢黃衣人圍城後主惡之遶城橘樹伐去之
隋高祖受禪後上下通服黃衣未幾隋師攻圍之應也
後周靜帝大象二年天雨細黃土移時乃息與大同元
年同占時宣帝昏狂滋甚其年崩靜帝立禪於隋

隋文帝開皇二年京師雨土時帝懲周室諸侯微弱至
亡乃分封諸子並爲行臺專制方面失土之故有土氣
之祥後諸王各謀爲逆亂京房易飛候曰天雨土百姓
勞苦而無功時營都邑起仁壽宮頽山堙谷死者大半
唐太宗貞觀七年三月丁卯雨土 二十年閏三月己

酉有黃雲闊一丈東西際天黃爲土功 高宗永徽三
年三月辛巳雨土 中宗景龍元年六月庚午陝州雨
土十二月丁丑雨土 元宗天寶十三載二月丁丑雨
黃土 代宗大歷七年十二月丙寅雨土 德宗貞元
二年四月甲戌雨土 八年二月庚子雨土 文宗太
和八年十月甲子土霧晝昏至於十一月癸丑 開成
元年七月乙亥雨土 懿宗咸通十四年三月癸巳雨
黃土 僖宗中和二年五月辛酉大風雨土 昭宗天
復三年二月雨土天地昏霾 天祐元年閏四月甲辰
大風雨土

乾隆十二年校刊

文獻通考卷三百一十五 物異八

七

宋太宗淳化三年正月乙卯京師雨土占曰小人叛自
後李順盜據益州 英宗治平元年三月辛酉十二月
乙巳雨土 二年三月壬戌雨土十二月己亥雨黃土
神宗熙寧五年十二月癸未七年三月戊午並雨黃
土 八年五月丁丑雨黃土兼細毛 元豐二年十一
月丁亥五年二月乙巳六年四月辛未雨土 哲宗元
祐七年正月戊午天雨塵土主民勞苦 徽宗宣和元
年三月庚午雨土着衣主不肖者食祿 高宗紹興元
年十二月庚辰夜有黃白氣 十一年馮康國言三月
庚申涇州雨黃沙語在金傳及夜妖 十八年十一月

壬辰上御麗正門肆赦天有雲赤黃近黃祥也太史附
秦檜旨奏以爲瑞 孝宗乾道四年三月己丑雨土若
塵 淳熙四年二月戊戌五年二月甲申四月丁丑六
年十一月乙丑十一年正月辛卯甲寅十三年正月壬
寅皆雨土 十五年九月庚子南方有赤黃氣 光宗
紹熙四年十月甲寅五年四月癸卯皆雨土十月乙未
天有赤黃色占曰是爲天變色先赤後黃近黃赤祥也
十一月辛亥雨土

文獻通考卷第三百二

文獻通考卷第三百三

鄱陽馬端臨貴與著

物異考九

恒雨

春秋魯隱公九年三月癸酉大雨震電庚辰大雨雪師古

日雨雪雨音于具反大雨雨水也師古曰下雨音于具反後類並同震雷也劉歆

以為三月癸酉於歷數春分後一日始震電之時也當

雨而不當大雨大雨恒雨之罰也於始震雷八日之間

而大雨雪恒寒之罰也劉向以為周三月今正月也當

雨水雪雜雨雷電未可以發也既已發也則雪不當復

降皆失節故謂之異於易雷以二月出其卦曰豫

師古曰坤

下震上也

言萬物隨雷出地皆逸豫也以八月入其卦曰歸

師古曰兌

妹下震上也言雷復歸入地則孕毓根核保藏蟄蟲

師古

曰毓字與育同核亦芟字也草根曰芟音該

避盛陰之害出地則養長華實

發揚隱伏宣盛陽之德入能除害出能興利人君之象

也是時隱以弟桓幼代而攝立公子翬見隱居位已久

勸之遂立

師古曰公子翬魯大夫羽父也勸殺桓公已求為太宰翬音揮

隱既不許翬

懼而易其辭

師古曰反謂桓公云隱欲殺之

遂與桓共殺隱天見其將

然故正月大雨水而雷電是陽不閉陰出涉危難而害

萬物天戒若曰為君失時賊弟佞臣將作亂矣後八日

大雨雪陰見閒隙而勝陽篡殺禍將成也公不寤後二年而殺

漢昭帝始元元年七月大水雨自七月至十月 成帝

建始三年秋大雨三十餘日 四年九月大雨十餘日

王莽地皇元年九月大雨六十餘日

光武建武六年九月大雨連月禾稼更生鼠巢樹上

十七年洛陽暴雨壞民廬舍壓殺人傷害禾稼 和帝

永元十年十三年十四年十五年皆淫雨傷稼 安帝

永初元年四年秋郡國十淫雨傷稼

方儲對策曰雨不時節妄賞賜也

永寧元年郡國二十三淫雨傷稼

建光元年京都

及郡國二十九淫雨傷稼是時羌反久未平百姓屯戍不解愁苦 延光元年郡國二十七淫雨傷稼

按本傳陳忠奏

以為王侯二千石為女使伯榮獨拜車下柄在臣妾

二年郡國五連雨傷稼

順帝永建四年司隸荆豫兗冀部淫雨傷稼 六年冀

州淫雨傷稼 桓帝延熹二年夏霖雨五十餘日是時

大將軍梁冀秉政擅殺其年冀伏誅 靈帝建寧元年

夏霖雨六十餘日時大將軍竇武謀誅中官事泄為曹

節等所害 熹平元年夏霖雨七十餘日時宦官曹節

等譖殺渤海王悝 中平六年夏霖雨八十餘日時靈

帝初崩大將軍何進等謀誅廢宦官中常侍張讓等共

殺進兵戰京都地死者數千

魏明帝太和元年秋數大雨多暴卒雷電非常至殺鳥

雀時帝居喪不哀出入弋獵無度奢侈繁興故恒雨為

罰 四年八月大雨霖三十餘日伊洛河漢皆溢

吳孫亮太平二年二月甲寅大雨震電乙卯雪大寒按

劉歆以為此時當雨而不當大雨劉向以為既已雷電

則雪不當復降皆失時候之異與春秋魯隱同其後亮

卒見廢

晉武帝泰始六年六月大雨霖甲辰河洛伊沁水同時

並溢流四千九百餘家殺二百餘人沒秋稼千三百六

十餘頃 太康五年七月任城梁國暴雨害豆麥九月
南安郡霖雨暴雪樹木摧折害秋稼是秋魏郡西平郡
九縣淮南平原霖雨暴水霜傷秋稼 惠帝永寧元年
十月義陽南陽東海霖雨淹害秋麥 元帝太興三年
春雨至於夏是時王敦執權不恭之罰也 永昌元年
春四十餘日晝夜雷電震五十餘日是時王敦興兵王
師敗績之應也 成帝咸和四年春雨三十餘日恒雷
電是時雖斬蘇峻其餘黨猶據守石頭至其滅後淫雨
乃霽 咸康元年八月乙丑荊州之長沙攸醴陵武陵
之龍陽三縣雨水浮漂屋室殺人損秋稼是時帝幼權
在於下

梁武帝天監七年七月雨至十月乃霽時頻年興師諸
軍頗捷而士卒疲敝百姓怨望陰氣畜積之應也

陳宣帝太建十二年八月大雨霽霖時始興王叔陵驕
恣陰氣强盛之應也明年帝崩後主立叔陵作亂討平
之

東魏孝靜武定五年秋大雨七十餘日元瑾劉思逸謀
殺齊文襄之應也

北齊武成河清三年六月庚子大雨晝夜不息至甲辰
山東大水人多餓死是歲突厥寇并州陰戎作梗之應

後主天統三年十月積陰大雨胡太后淫亂所感
武平七年七月大霖雨水滂人戶流亡時駱提婆韓長
鸞等用事小人專政

後周武帝建德三年七月霖雨三旬時衛刺王直潛謀
逆亂屬帝幸雲陽宮以其徒襲肅章門尉遲運逆拒破
之其日雨霽

唐高祖武德六年秋關中久雨少陽日暘少陰日雨陽
德衰則陰氣勝故常雨 太宗貞觀十五年春霖雨

高宗永徽六年八月京城大雨 顯慶元年八月霖雨
更九旬乃止 元宗開元二年五月壬子久雨滌京城

門 十六年九月關中久雨害稼 天寶五載秋大雨

十二載八月久雨 十三載秋大霖雨害稼六旬不

止九月閉坊市北門蓋井禁婦人入街市祭元冥太社
崇明德門壞京城垣屋殆盡人亦乏食 肅宗至德二

載三月癸亥大雨至甲戌乃止 上元元年四月雨訖

閏月乃止 二年秋霖雨連月渠竇生魚 代宗永泰

元年九月丙午大雨至於丙寅 大歷四年四月雨至

於九月閉坊市北門置土臺臺上置壇立黃幡以祈晴

六年八月連雨害秋稼 德宗貞元二年正月乙未

大雨雪至於庚子平地數尺雪上黃黑如塵五月乙巳

雨至於丙申時大饑至是麥將登復大雨霖衆心恐懼
十年春雨雨閏四月間止不過一二日 十一年秋大
雨 十九年八月己未大霖雨 憲宗元和四年四月
冊皇太子寧以雨霑服罷十月再擇日冊又以雨霑服
罷近常雨也 六年七月霖雨害稼 十二年五月連
雨八月壬申雨至於九月戊子 十五年二月癸未大
雨八月久雨閉坊市北門宋滄景等州大雨自六月癸
酉至於丁亥廬舍漂沒殆盡 敬宗寶歷元年六月雨
至於八月 文宗太和四年夏鄆曹濮等州雨壞城郭
廬舍殆盡 五年正月庚子朔京城陰雪彌旬 開成

五年七月霖雨葬文宗龍輜陷不能進 宣宗大中十
年四月雨至於九月 懿宗咸通九年六月久雨崇明
德門 僖宗乾符五年秋大霖雨汾澮及河溢流害稼
廣明元年秋八月大霖雨 昭宗天復元年八月久
雨

後唐莊宗同光三年六月至九月大雨江河決壞民田
廢帝清泰元年九月連雨害稼

周太祖廣順二年七月暴風雨京師水深二尺諸州皆
奏大雨

宋太祖開寶元年六月州府二十三大雨水江河泛溢

壞民廬舍 二年二月車馬駐潞州積雨累日未止九月京師大雨霖 五年五月京師大雨連旬不止諸州皆言大雨霖 八年五月京師大雨水 九年三月京師大雨水秋又霖雨 太宗太平興國五年五月京師連旬雨不止 雍熙三年八月京師大霖雨 淳化三年九月京師霖雨 四年七月京師大雨十晝夜不止 五年秋開封府宋亳陳潁泗壽鄧州雨水害稼 至道元年四月甲辰京師大雨雷電道上水數尺 二年廣南諸州並大雨水 真宗咸平四年六月京師大雨漂壞廬舍積潦浸路 天禧四年七月京師連雨彌月

甲子夜大雨流潦泛溢民舍軍營自是頻雨及冬方止

乾興元年二月蘇湖秀二州雨壞民田 仁宗天聖

四年六月庚寅京師大雨震雷平地水數尺九月壬申

京東江淮閩浙諸州雨水 七年自春涉夏雨不止

嘉祐元年五月丁未晝夜大雨乙亥雨壞太社太稷壇

自五月大雨不止水壞官私廬舍城中繫棧渡人 四

年八月霖雨害稼 六年七月河北京西淮南江浙四

路淫雨爲災閏八月京師久雨 英宗治平元年京師

自夏歷秋久雨不止真宗及穆獻懿三后陵臺爲雨所

摧 二年八月庚寅大雨地上涌水壞官私廬舍漂殺

人畜不可勝數是日御崇政殿宰執而下朝參者十數人而已詔開西華門以洩宮中積水水奔激東殿侍班屋皆摧没人畜溺死官爲葬祭其無主者千五百八十人 神宗熙寧七年六月熙州大雨洮河溢陝州大雨漂溺陝平陸二縣 九年七月太原府汾河夏秋霖雨水大漲 哲宗元祐二年七月丁卯以雨罷集英殿宴 四年夏秋霖雨河流泛漲 八年自四月常雨至八月晝夜霖霖畿內及諸路大水詔開京師宮觀五日所在令長吏祈禱宰臣呂大防等待罪 紹聖元年七月京畿久雨諸路水害稼 二年六月久雨九月以久雨

罷秋宴 三年七月久雨哲宗大昇輦在道陷泥中

徽宗建中靖國元年二月久雨 崇寧元年七月久雨

壞京城廬舍民多壓溺死 三年六月久雨 四年五

月京師久雨又自七月至九月所在霖雨傷稼十月始

霽 宣和元年五月大雨水驟高十餘丈 六年秋京

畿常雨河北兩浙水災民多流移 欽宗靖康元年四

月京師大雨天氣清寒又自五月甲申至六月暴雨傷

麥夏行秋令 高宗建炎二年春霖雨 三年二月上

至杭州久陰霖雨占曰陰盛下有陰謀時苗劉爲逆後

五十日伏誅五月霖雨夏寒 紹興元年行都雨壞城

三百八十丈是歲婺州雨亦敗城郭 三年雨自正月

元日至於二月 尋詔恤刑 七月四川霖雨至於越歲正月 謂上

張浚久屯繁調所致戒以撫民 四年六月霪雨害稼蘇湖二州為甚

乙未 九月久雨時逆豫連金虜入寇十月戊戌上親征

而霽 五年三月霖雨傷蠶麥行都雨甚 庚子慮獄已未發廩 九

月雨至於明年正月 賑都民者再 七年十月上如建鄴久

雨 八年三月積雨至於四月傷蠶麥害稼 二十一

年夏襄陽府大雨十餘日 二十三年六月大雨壞軍

壘民田 辛酉子緡蠲賦 三十年五月辛卯大風雨語在水傳

三十一年四月久雨傷蠶麥害稼 三十二年六月

浙西大霖雨 孝宗隆興元年三月霖雨行都壞城郭

三百三十餘丈 二年六月霪雨沉陰七月浙西江東

大雨霖傷稼八月風雨霖霪踰月 乾道二年正月霪

雨至於四月夏寒江浙郡國損稼蠶麥不登 三年八

月霖雨妨穡江浙淮閩禾麻菽粟多腐 四年四月陰

雨彌月 六年五月連雨六十餘日十一月連雨辛巳

郊開雲於園丘百步外有霪雨 八年四月四川陰雨

七十餘日六月壬寅大雨徹晝夜至於己酉為災 九

年閏正月霪雨 淳熙三年五月淮浙積雨損禾麥八

月浙東西江東連雨癸未甲申行都大風雨九月久雨

乾隆十二年校刊 文獻通考卷三百三 物異九

妨穡 六年九月連雨已巳將郊而霽 八年四月雨
腐禾麥五月久雨敗首種 十一年四月霪雨 十二
年五月六月皆霖雨 十五年五月荆淮郡國連雨
十六年五月浙西湖北福建淮東利西諸道大雨霖
光宗紹熙元年春久陰連雨至於三月 二年四月福
建路霖雨至五月七月利路久雨傷種麥八月行都久
雨 三年五月江東湖北路連雨七月淮西鎮江襄陽
雨害禾麥 四年四月霖雨至於五月浙東西江東湖
北淮西郡縣壞圩田害蠶麥蔬種 五年八月霖雨浙
東西北皆害稼九月雨至於十月江東福建皆苦雨

寧宗慶元元年正月霖雨二月又雨至三月害麥五月
霖雨七月雨至八月 二年八月行都霖雨五十餘日
三年七月雨連月 五年五月行都雨壞城夜壓附
城民廬多死者六月浙東霖雨至於八月 嘉泰二年
六月福建路連雨至於七月 三年八月久雨 開禧
元年七月利路霖雨敗稼十月行都霪雨至明年春三
月 嘉定三年三月陰雨六十餘日五月潦雨至於六
月首種多敗蠶麥不登 四年八月霖雨至於九月
五年春霪雨至於三月傷蠶麥十一月雨雪積陰至於
明年春二月霪雨五月霖雨陰沉浙東西六月雨至於

七月 七年九月陰雨至於十月害禾麥 九年四月
霖雨六月大雨霖二十餘日浙東西郡縣爲災 十年
三月連雨至於四月十月霖雨敗穡 十一年六月浙
西大霖雨 十二年六月霖雨彌月 十五年七月浙
東西霖雨爲災 十六年五月霖雨浙西湖北江東淮
東尤甚八月大風雨敗稼 十七年八月霖雨

甘露

漢宣帝甘露元年甘露降
後漢光武建武十二年夏甘露降 中元元年郡國頻
上言甘露降 明帝永平十七年正月甘露降於甘陵

章帝建初四年甘露降泉陵洮陽二縣 安帝延光

三年四月壬戌沛國言甘露降豐縣七月馮翊言甘露
降頻陽衙 桓宗延熹元年上郡言甘露降

魏高貴鄉公甘露元年五月鄴及上谷並言甘露降

陳留王咸熙二年四月南深澤縣言甘露降

吳孫權黃武二年曲阿言甘露降 嘉禾五年武昌言

甘露降於禮賓殿 赤烏二年零陵言甘露降 九年

武昌言甘露降 孫皓甘露元年四月蔣陵言甘露降

遂改元

陳宣帝太建七年甘露頻降樂游苑立甘露亭

魏太武太延元年甘露降於殿內

唐高祖武德九年四月甘露降於中華殿之桐樹泣如
冰雪以示羣臣 德宗貞元十年正月西川奏當管甘
露降松柏樹竹藜等二千四百四十二處

蜀王建元年嘉陽諸州言甘露降

宋太祖乾德四年二月長春節甘露降江陵府報恩院
連十日霏微如烟霧漬栢葉皆甘 太宗太平興國三
年正月甘露降壽州解色如琥珀徧覆庭檜 端拱二
年二月甘露降壽州解園栢及資聖寺檜狀若華蘼色
如凝脂 真宗咸平元年富順監有甘露降梅柳霏酒

如珠 神宗景德元年九月甘露降桂州永寧縣桐樹
如稻米色白

按三朝國史有符瑞志內述甘露自乾德而後州
縣所上甚多咸平以來尤甚幾無歲無之此姑著
其一二云

神宗熙寧元年距元豐八年天下言甘露降凡二十餘
處 哲宗元祐元年距元符三年如之 徽宗建中靖
國元年距宣和七年中外言甘露降多不可紀其尤著
者大觀初降於九城宮帝龔室三年冬降於尚書省及
曹御製七言四韻詩賜執政以下其後內自禁中及宣

和殿延福宮神霄宮下三學開封府大理寺宰臣私第
皆有之歲歲拜表稱賀

天雨異物

春秋文公三年秋雨螽于宋公羊傳雨螽者何墜而死
也穀梁傳著於上見於下謂之雨詳見蝗顯王三年

雨金於櫟陽

言雨金於秦國都明金瑞見也

赧王三十一年齊千乘

博昌之間方數百里雨血沾衣時燕昭王伐齊齊潛王
出奔為楚將淖齒所弑

漢惠帝二年天雨血於宜陽一頃所

詳見赤青

元帝永光

二年八月天雨草

詳見草妖

成帝鴻嘉四年秋雨魚於信

都長五寸以下

哀帝建平四年山陽湖陵雨血廣三

尺長五尺大者如錢小者如麻子

平帝元始元年正

月天雨草

詳見草妖

後漢桓帝建和三年秋七月北地廉雨肉似羊肋肋脅骨也
或大如手

晉武帝泰始八年五月蜀地雨白毛

詳見白祥門

惠帝永

康元年尉氏雨血 愍帝建興元年河東地震雨肉

劉聰時平陽星墜為肉長三十步

各詳見赤祥門

隋文帝開皇二年京師雨土

各見黃祥門

六年七月京師

雨毛如髮尾長者三尺餘短者六七寸

詳見羊白青

十二

年空中有物鬪而墜如羝羊詳見羊禍門

北齊武成河清二年太原雨血

梁武帝大同元年天雨土 二年天雨灰其色黃 簡

文帝大寶元年天雨黃沙詳見黃祥門

後周靜帝大象二年正月天雨黃土

唐高祖武德初突厥雨血三日 武太后垂拱三年廣

州雨金 四年雨桂子於台州旬餘乃止占曰天雨草

木人多死 中宗神龍二年越州雨毛 德宗貞元四

年雨水於陳留十里許大如指長寸餘中空所下立如

植詳見木不曲直門是歲大雨有物墮地如豬詳見豕禍門 二十

七年京師雨赤雪 僖宗乾符二年洛陽暴雨有物墮

地如羝羊詳見羊禍門 光啓二年揚州雨魚

太宗貞觀七年三月 高宗永徽三年三月 中宗景

龍元年六月十二月 元宗天寶十三載二月 代宗

大歷七年十二月 德宗貞元二年四月 八年二月

文宗開成元年七月 懿宗咸通十四年三月 僖

宗中和二年五月 昭宗天復三年二月 天祐元年

閏四月俱雨土

宋太宗淳化三年正月京師雨土 神宗熙寧元年三

月丁酉潭州雨毛 八年五月丁丑雨黃土兼細毛

元豐三年六月己未饒州長山雨木子數畝狀類山芋
子味香而辛土人以爲桂子又曰菩提子明道中嘗有
之是歲大稔 五年三月己巳六年四月辛未雨土
哲宗元祐七年正月天雨塵土主民勞苦 徽宗宣和
元年三月雨土 高宗紹興二十六年七月雨水銀

文獻通考卷第三百三

文獻通考卷第三百四

鄱陽馬端臨貴與著

物異考十

恒暘

春秋僖公二十一年夏大旱董仲舒劉向以爲齊桓既
死諸侯從楚僖尤得楚心外倚強楚炕陽失衆又作南
門勞民興役諸雩旱不雨畧皆同說 宣公七年秋大
旱是夏宣與齊侯伐萊 襄公五年秋大雩先是楚伐
宋取彭城鄭畔中國附楚襄與諸侯共圍彭城城鄭虎
牢以禦楚有炕陽動衆之應 八年九月大雩時作三

軍季氏盛 二十八年八月大雩先是比年晉使荀吳
齊使慶封來聘是夏邾子來朝襄有炕陽自大之應
昭公三年八月大雩劉歆以爲昭公居喪不哀炕陽失
衆 六年九月大雩時魯莒連兵有炕陽動衆之應
十六年九月大雩先是昭公母夫人歸氏薨昭不感與
三年同占 二十四年八月大雩時魯襲邾師邾愬於
晉晉執我行人叔孫婁 二十五年七月上辛大雩季
辛又雩旱甚也劉歆以爲時后氏與季氏有隙公信讒
伐季氏爲所敗出奔齊 定公十年九月大雩時公侵
鄭城中城圍鄆 莊公三十一年冬不雨是歲一年而

三築臺奢侈不恤民

僖公二十年冬十月不雨三年

春正月不雨夏四月不雨六月雨時南敗邾東敗莒有

炕陽之應

文公二年自十二月不雨至於秋七月文

公卽位天子使叔服會葬毛伯賜命又會晉侯於戚公

子遂如齊納幣又與諸侯盟上得天子外得諸侯沛然

自大躋僖公主大夫始顓事

謂季孫行父也

十年自正月不

雨至於秋七月先是公子遂會四國而救鄭楚使越椒

來聘秦人歸禭有炕陽之應

十三年自正月不雨至

於秋七月先是曹伯杞伯滕子來朝邾伯來奔秦伯使

遂來聘季孫行父城諸及鄆二年之間五國趨之內城

二邑炕陽失衆一日不雨而五穀皆熟異也文公時大夫始專盟會公孫敖會晉侯又會諸侯盟於垂隴故不雨而生者陰不出氣而私自行以象施不由上出臣下作福而私自成一曰不雨近常陰之罰君弱也

秦始皇十二年天下大旱六月至八月乃雨

漢惠帝五年夏大旱江河水少谿谷絕先是發民男女十四萬六千人城長安是歲城乃成 文帝三年秋天下旱是秋匈奴寇邊發兵擊之出塞其秋濟北王興居反討平之 後六年天下大旱時匈奴大入上郡雲中烽火通長安遣三將軍屯邊又三將軍屯京師 九年

春大旱

景帝中三年秋大旱後二年秋大旱 武帝

建元四年六月旱

元光六年夏大旱是歲四將軍征

匈奴

元朔五年春大旱是歲六將軍衆十餘萬征匈

奴

元狩三年夏大旱是歲發天下故吏伐棘上林穿

昆明池

元封六年秋大旱 天漢元年夏大旱其三

年夏大旱先是貳師將軍征大宛還三將軍征匈奴李陵沒不還 征和元年夏大旱是歲始治巫蠱明年衛

皇后太子敗

昭帝始元六年大旱先是大鴻臚田廣

明征益州暴師連年

元鳳五年夏大旱 宣帝本始

元年夏大旱東南數千里先是五將軍衆二十萬征匈

奴 神爵元年秋大旱是歲後將軍趙克國征西羌

元帝建昭二年大旱 成帝永始三年四年夏大旱

平帝建平四年春大旱

後漢世祖建武三年七月洛陽大旱 五年夏旱京房

易傳曰欲德不用茲謂張厥災荒其旱陰雲不雨變而

赤因四陰衆出過時茲謂廣其旱不生上下皆蔽茲謂

隔其旱天赤三月時有電殺飛禽上緣求妃茲謂僭其

早三月大溫亡雲君高臺府茲謂犯陰侵陽其旱萬物

根死有火災庶位踰節茲謂僭其旱澤物枯為火所傷

春秋考異郵曰國大旱冤獄結旱者陽氣移精不施君上失制奢淫僭差氣亂或天則旱徵見又云陰厭陽移

君所以感之者上奢則求多求多則下竭下竭則潰君不

仁管子曰春不收枯骨伐枯木而起去之則夏旱方儲

對策曰百姓苦土卒煩碎責租稅失中暴師外營經歷

三時內有怨女外有曠夫王者熟推其祥揆合於天圖

不行萬民煩擾是時天下僭逆者未盡誅軍多過時古今

注曰建武六年六月九年春十二年五月二十一年六月

月明帝永平元年五月八年冬十一年八月十三年八月

三月並旱 章帝章和二年夏旱時章帝崩後竇太后

兄弟用事奢僭古今注曰建初二年夏雜陽旱四年夏

大旱穀貴終以為廣陵楚淮陽濟南之獄徙者數萬人

吏民怨曠上疏云久旱孔藜曰建初元年大旱天子憂

乾隆十二年校刊

文獻通考卷三百物異十

之事焉天子納其言而從之三日

和帝永元六年秋

京師旱時雒陽有冤囚和帝幸雒陽寺錄囚徒理冤囚

收令下獄抵罪行未還宮澍雨降

古今注曰永元二年郡國十四旱十五年

丹陽郡國八旱分遣議郎請雨按本紀二年五月旱皇太后

后幸雒陽寺錄囚徒即日雨六月京

安帝永初六年

夏旱古今注曰三年郡國

七年夏旱

元初元年夏

早二年夏旱

三年夏旱時西羌寇亂

六年夏旱

古今

注曰建光元年郡國四旱延

順帝永建三年夏旱

五年夏旱

陽嘉二年夏旱時李固對策以為奢僭所致也

致也

臣昭按本紀元年二月京師旱郎顛傳人君恩澤不施於民祿去公室臣下專權所致也又周舉傳

三年河南三輔大旱五穀傷災天子親自露坐德陽殿東廂請雨

冲帝永嘉元年夏

早時冲帝幼崩太尉李固勸太后及兄梁冀立嗣帝擇

年長有德者天下賴之則功名不朽年幼未可知如後

不善悔無所及時太后及冀貪立年幼欲久自專遂立

質帝八歲此不用德

古今注曰本初元年

桓帝元嘉元

年夏旱是時梁冀秉政妻子並受封寵踰節 延熹元

年六月旱

京房占曰人君無施澤惠利於下則致旱也

兆民勞功不御憂悲之感以致水旱之困也

靈帝熹

平五年夏旱

蔡邕作伯夷叔齊碑曰熹平五年天下大

字元成夢陟首陽有神馬之使在道明覺而思之以其

乾隆十二年校刊

文獻通考卷三 物異十

登山升祠手書要曰君况我聖主以

六年夏旱 光

洪澤之福天尋興雲即降甘雨也

和五年夏旱 六年夏旱是時常侍黃門僭作威福

獻帝興平元年秋長安旱是時李傕郭汜專權縱肆

起居注曰建安十魏明帝太和二年五月大旱元年已來崇廣宮府之應

也又是春宣帝擒孟達張郃破諸葛亮斃馬謖亢陽自

大又其應也 太和五年三月自去冬十月至此月不

雨辛巳大雩 齊王正始元年二月自去冬十二月至

此月不雨去歲曹爽白帝轉宣帝為太傅外示尊崇內

實厥令事先由巳時宣帝功蓋魏朝欲德不用之應也

高貴鄉公甘露二年正月自去秋至此月旱時文帝圍

諸葛誕眾出過時之應也初壽春秋夏常雨淹城而此

旱踰年城陷乃大雨咸以誕為天亡

吳孫權嘉禾四年自十月不雨至於夏 孫亮五鳳二

年大旱百姓饑是年征役煩興軍士怨叛此亢陽自大

勞役失眾之罰也其役彌歲故旱亦竟年 孫皓寶鼎

元年春夏旱時皓遷都武昌勞役動眾之應

晉武帝泰始七年五月閏月旱大雩 八年五月旱是

時帝納荀勗邪說留賈充不復西鎮而任愷漸踈上下

皆蔽之應也及李熹魯芝李允等並在散職近厥德不

用之謂也 九年自正月旱至於六月祈宗廟社稷山
川癸未雨 十年四月旱去年秋冬採擇鄉校諸葛冲
等女是春五十餘人入殿簡選又取小將吏女數千人
母子號哭於宮中聲聞於外行人悲酸是殆積陰生陽
上緣求妃之應也 咸寧二年五月旱大雩至六月乃
澍之戊反雨 太康二年旱自去冬至此春 三年四
月旱乙酉詔司空齊王攸與尚書廷尉河南尹錄訊繫
囚事從蠲宥 五年六月旱此年正月天陰解而復合
劉毅上疏曰必有阿黨之臣姦以事君者當誅而不赦
也帝不答是時荀勗馮統僭作威福亂朝尤甚 六年

三月青梁幽冀郡國旱六月濟陰武陵旱傷麥 七年
夏郡國十三大旱 八年四月冀州旱 九年夏郡國
三十三旱扶風始平京兆安定旱傷麥 十年二月旱
太熙元年三月旱自太康後雖正人滿朝不被親仗
而賈充荀勗楊駿馮統等迭居要重所以無年不旱者
欲德不用上下皆蔽庶位踰節之罰也 惠帝元康七
年七月秦雍二州大旱疾疫關中饑米斛萬錢因此氏
羌反叛雍州刺史解系敗績而饑疫荐與洵同臻戎晉
並困朝廷不能振詔聽相賣鬻其九月郡國五旱 永
寧元年自夏及秋青徐幽并四州旱十二月又郡國十

二旱是年春三王討趙王倫六旬之中數十戰死者十餘萬人 懷帝永嘉三年五月大旱襄平縣梁水淡池竭河洛江漢皆可涉是年三月司馬越歸京都遣兵入宮收中書令繆播等九人殺之皆僭踰之罰也又四方諸侯多懷無君之心劉元海石勒王彌李雄之徒賊害百姓流血成泥又其應也 五年自去冬旱至此春去歲十一月司馬越以行臺自隨斥黜宮衛無君臣之節愍帝建興元年六月揚州旱去年十二月淳于伯寃死之應 元帝太興元年六月又旱干寶曰殺淳于伯之後旱三年是也刑罰妄加羣陰不附則陽氣勝之罰

也 元帝太興四年五月旱是時王敦陵僭已著 永

昌元年夏大旱是年三月王敦有石頭之變二宮陵辱大臣誅死僭踰無上故旱尤甚也其閏十一月京都大旱川谷並竭 明帝太寧三年自春不雨至於六月

成帝咸和元年夏秋旱是時庾太后臨朝稱制言不從而僭踰之罰也 二年夏旱 五年五月大旱 六年

四月大旱 八年秋七月旱 九年自四月不雨至於

八月 咸康元年六月旱是時成帝冲弱未親萬機內外之政決之將相此僭踰之罰連歲旱也至四年王導固讓太傅復子明辟是後不早殆其應也時天下普旱

會稽餘姚特甚米斗直五百人有相鬻者 二年三月旱 三年六月旱時王導以天下新定務在遵養不任刑罰遂盜賊公行頻五年亢旱亦舒緩之應也 康帝建元元年五月旱 穆帝永和元年五月旱是時帝在襁褓褚太后臨朝如明穆太后故事 五年七月不雨至於十月 六年夏旱 八年夏旱 九年春旱 升平三年冬大旱 四年冬大旱 哀帝隆和元年夏旱是時桓溫彊恣權制朝廷踰僭之罰也 海西公太和元年夏旱 四年冬旱涼州春旱至夏 簡文帝咸安二年十月大旱饑自永和至是嗣主幼冲桓溫陵僭用

兵征伐百姓怨苦 孝武帝寧康元年三月旱是時桓溫入覲高平陵闖朝致拜踰僭之應也 三年冬旱

太元四年夏太旱 八年六月旱 十年七月旱饑初

八年破苻堅九年諸將畧地有事徐豫楊亮趙統攻討

巴沔是年正月謝安又出鎮廣陵使子琰進次彭城頻

有軍役 十三年六月旱去歲北府遣戍胡陸荊州經

畧河南是年夏郭銓置戍野王又遣軍破黃淮 十五

年七月旱 十七年秋旱至冬是時烈宗仁恕信任會

稽王道子政事舒緩又茹千秋爲驃騎諮議竊弄主相

威福又邱尼乳母親黨及婢僕之子階緣近習臨部領

衆又所在多上春禁囚不以其辜建康獄吏枉暴旣甚
此又僭踰不從寬濫之罰 安帝隆安二年冬旱寒甚
四年五月旱 五年夏秋大旱十二月不雨時孫恩
作亂桓元疑貳迫殺殷仲堪而朝廷卽授以荊州之任
司馬元顯又諷百僚悉使敬已內外騷動兵甲煩興此
皆陵僭憂愁之應也 元興元年七月大饑九月十月
不雨泉水涸 二年六月不雨冬又旱時桓元奢僭十
二月遂篡位 三年八月不雨 義熙四年冬不雨
六年九月不雨 八年十月不雨 九年秋冬不雨
十年九月旱十二月又旱井瀆多竭是時軍役煩興

宋文帝元嘉八年夏六月旱大雩 二十八年三月大
旱 孝武大明八年東諸郡大旱甚者米一斗數百都
下亦至百餘錢餓死者十六七

梁武帝天監元年大旱米斗五千人多餓死洪範五行
傳曰君持亢陽之節興師動衆勞人過度故旱災應初
帝起兵襄陽破張冲敗陳伯之及平建康前後連戰百
姓勞敝及卽位後復與魏交兵不止之應也 簡文帝
大寶元年夏大旱人相食都下尤甚

陳宣帝太建十二年春不雨至四月先是周師掠淮北
始興王叔陵等諸軍敗績淮北地皆沒於周是其應也

後魏孝文太和十五年自正月不雨至於四月 宣武
 景明四年旱 正始元年旱 永平二年旱 三年冀
 定二州旱 延昌元年自二月不雨至五月 孝明神
 龜元年自正月不雨至六月 正元二年旱 孝靜帝
 天平二年大旱
 東魏天平四年并肆汾建晉絳秦陝等諸州大旱人多
 流散是歲齊神武與西魏戰於沙苑敗績死者數萬
 武定二年冬春旱先是西魏師入洛陽神武親帥軍大
 戰於邙山死者數萬
 後齊天保九年夏大旱先是大發卒築長城四百餘里

勞役之應也 乾明元年春旱先是發卒數十萬築金
 鳳聖應崇光三臺窮極侈麗不恤百姓亢陽之應也
 河清二年四月并晉已西五州旱是歲發卒築軹關突
 厥二十萬衆毀長城寇恒州 後主天統二年春旱是
 時大發卒起大明宮

隋開皇四年已後京師頻旱時遷都龍首建立宮室百
 姓勞敝亢陽之應也 大業四年燕代緣邊諸郡旱時
 發卒百餘萬築長城帝親巡塞表百姓失業道殣相望
 八年天下旱百姓流亡時發四海兵帝親征高麗六
 軍凍餓死者十八九 十三年天下大旱時郡縣鄉邑

悉遣築城發男女無少長皆就役

唐武德三年夏旱至於八月乃雨 四年自春不雨至於七月雨少陰之氣其氣毀則不雨少陰者金也金為刑為兵刑不辜兵不戢則金氣毀故常為旱火為盛陽陽氣強悍故聖人制禮以節之禮失則僭而驕亢以導盛陽火勝則金衰故亦旱於五行土實制水土功興則水氣壅闕又常為旱天官有東井主水事天漢天江亦水祥也水與火仇而受制於土土火謫見若日蝕過分而未至與七曜循中道之南皆旱祥也 七年秋關內河東旱 貞觀元年夏山東大旱 二年春旱 三年

春夏旱

四年春旱自太上皇傳位至此而比年水旱

九年秋劔南關東州二十四旱

十二年吳楚巴蜀

州二十六旱冬不雨至於明年五月

十七年春夏旱

二十一年秋陝絳蒲夔等州旱

二十二年秋開萬

等州旱冬不雨至於明年三月

永徽元年京畿雍同

絳等州十旱

二年九月不雨至於明年二月

四年

夏秋旱光婺滁潁等州尤甚

顯慶五年春河北州二

十二旱

總章元年京師及山東江淮大旱

二年七

月劔南州十九旱冬無雪

咸亨元年春旱秋復大旱

儀鳳二年夏河南河北旱

三年四月旱

永隆二

年關中旱霜大饑 永淳元年關中大旱饑 二年夏
河南河北旱 永昌元年三月旱 神功元年黃隨等
州旱 久視元年夏關內河東旱 長安二年春不雨
至於六月 三年冬無雪至於明年二月 神龍二年
冬不雨至於明年五月京師山東河北河南旱饑 太
極元年春旱七月復旱 開元二年春大旱 十二年
七月河東河北旱帝親禱雨宮中設壇席暴立三日九
月蒲同等州旱 十四年秋諸道州十五旱 十五年
諸道州十七旱 十六年東都河南宋亳等州旱 二
十四年夏旱 永泰元年春夏旱 二年關內大旱自

三月不雨至於六月 大歷六年春旱至於八月 建
中三年自五月不雨至於七月 興元元年冬大旱
貞元元年春旱無麥苗至於八月旱甚灞滻將竭井皆
無水 六年春關輔大旱無麥苗夏淮南浙西福建等
道大旱井泉竭人暍且疫死者甚衆 七年揚楚滁壽
澧等州旱 十四年春旱無麥 十五年夏旱 十八
年夏申光蔡州旱 十九年正月不雨至七月甲戌乃
雨 永貞元年秋江浙淮南荆南湖南鄂岳陳許等州
二十六旱 元和三年淮南江南江西湖南廣南山南
東西皆旱 四年春夏大旱秋淮南浙西江西江東旱

七年夏揚潤等州旱 八年夏同華二州旱 十五年夏旱 寶歷元年秋荆南淮南浙西江西湖南及宣襄鄂等州旱 太和元年夏京畿河中同州旱 六年河東河南關輔旱 七年秋大旱 八年夏江淮及陝華等州旱 九年秋京兆河南河中陝華同等州旱 開成二年春夏旱 四年夏旱浙東尤甚 會昌五年春旱 六年春不雨冬又不雨至明年二月 大中四年大旱 咸通二年秋淮南河南不雨至於明年六月 九年江淮旱 十年夏旱 十一年夏旱 廣明元年春夏大旱 中和四年江南大旱饑人相食 景福

二年秋大旱 光化三年冬京師旱至於四年春 宋建隆二年京師夏旱冬又旱 三年京師春夏旱河北大旱霸州苗皆焦仆又河南河中府孟澤濮鄆齊濟澶滑延隰宿等州並春夏不雨 四年京師夏秋旱又 懷州旱 乾德元年冬京師旱 二年正月京師旱夏不雨冬無雪是歲河南府陝虢麟博靈州旱河中府旱甚 四年春至夏京師不雨江陵府華州漣水軍旱 五年正月京師旱秋復旱冬無雪 開寶元年冬京師無雪 二年夏至七月京師不雨 三年春夏京師旱冬無雪 邠州夏旱 五年春京師旱冬又旱 六年冬

京師旱 七年京師春夏旱冬又旱河南府晉解州夏旱滑州秋旱 八年春京師旱是歲關西饑旱甚 太平興國二年正月京師旱 三年春夏京師旱 四年冬京師旱 七年春京師旱孟虢絳蜜瀛衛曹淄州旱 九年夏京師旱秋江南大旱 雍熙二年冬京師旱 三年冬京師旱 四年冬京師旱 端拱二年五月京師旱秋七月至十一月早上憂形於色蔬食致禱是歲河南登萊深冀旱甚民多饑死詔發倉粟貸之人五斗 淳化元年正月至四月不雨京師民饑上蔬食祈雨河南鳳翔大名京兆府許滄單汝乾鄭同州旱 二

年春京師大旱蝗冬復大旱是歲河南北河東陝西及亳建淮陽等三十六州軍旱 三年夏京師不雨河南府許汝亳滑商州旱 五年六月京師旱疫遣太醫和藥救之 至道元年京師春旱冬無雪 二年春夏京師旱冬無雪 咸平元年春夏京畿旱又江浙淮南荆湖四十六州軍旱 二年春京師旱甚又廣南西路江浙荆湖及曹單嵐州淮陽軍旱 三年春京師旱江南頻年旱歉多疾疫 四年京畿正月至四月不雨 景德元年京師夏旱人多暍死 三年夏京師旱 大中祥符二年春夏京師旱河南府及陝西路潭邢州旱

三年夏京師江南路及宿潤州旱 八年春京師旱
九年秋京師旱又大名府澶相州旱 天禧元年京師
春旱秋又旱夏陝西旱 四年春利州路旱夏京師旱
五年冬京師旱 天聖二年春不雨 八年辛未開
封府言陽武等一十三縣大旱傷苗 六年四月不雨
明道元年畿縣久旱傷苗 明道二年南方大旱種
餉皆絕人多流亡因饑成疫死者十二三官作粥糜以
飼之得食輒死 寶元元年益州路自夏至秋不雨兩
蜀大旱 慶歷三年京師自春至夏不雨 四年春京
師及諸路久不雨 七年正月京師不雨 皇祐三年

恩冀諸州旱 嘉祐五年梓州路夏秋不雨 七年春
旱 治平元年春京師踰時不雨鄭滑蔡汝潁亳曹濮
洛磁晉耀登等州河中府慶成軍旱 二年春不雨
熙寧二年三月旱甚 三年畿內及諸路旱八月衛州
旱 五年五月北京自春至夏不雨 七年自春至夏
河北河東陝西京東西淮南諸路久旱九月諸路復旱
時新復洮河亦旱羌戶多殍死 八年四月真定府旱
八月淮南兩浙江南荆湖等路旱 九年八月河北京
東西河東陝西旱 十年春諸路旱 元豐二年春河
北陝西京東西諸路旱 三年春西北諸路旱 五年

春旱 六年夏畿內旱 八年旱 元祐二年春旱
 三年秋諸路旱京西陝西尤甚 四年春京師及東北
 旱 五年旱 八年秋旱 紹聖元年春旱 三年江
 東大旱溪河涸竭 四年夏兩浙旱 元符元年東南
 旱 二年春京畿旱 建中靖國元年衢信州旱 大
 觀三年淮南江東西諸路大旱六月不雨至於十月
 政和元年淮南旱 三年江東旱疫 宣和元年淮南
 秋旱 四年東平府旱 五年夏秦鳳路旱是歲燕山
 府路旱 建炎二年夏旱 紹興二年常州大旱 三
 年四月旱至於七月 五年五月浙東西旱五十餘日

六月江東湖南旱秋四川郡縣旱甚 六年夔潼成都
 郡縣及湖南衡州皆旱 七年春旱七十餘日六月又
 旱 八年冬不雨 九年六月旱六十餘日 十一年
 七月旱 十二年三月旱六十餘日秋京西淮東旱
 十八年浙東西旱 二十九年二月旱七十餘日秋江
 浙郡國旱 三十年春階成鳳西和州旱秋江浙郡邑
 旱浙東尤甚 隆興元年江浙郡縣旱京西大旱 三
 年台州春旱興化軍漳州大旱首種不入自春至於
 八月 乾道三年春四川郡縣旱至於秋七月綿劔漢
 州石泉軍尤甚 四年六月旱襄陽隆興建寧俱旱

五年夏秋淮東旱盱眙淮陰爲甚 六年夏浙東福建
路旱溫台福漳建爲甚 七年春江東西湖南北淮南
浙婺秀州皆旱至於夏秋江洪筠潭饒南康興國臨江
尤甚首種不入冬不雨 九年浙東婺處溫台州江西
吉贛臨江南安湖北江陵府皆久旱無麥苗 淳熙元
年浙東湖南郡縣旱台處郴桂爲甚蜀關外四州旱
二年秋江浙淮皆旱紹興鎮江寧國建康常和滁真揚
盱眙廣德爲甚 三年夏浙西常昭復隨郢金洋州江
陵德安興元荆門漢陽皆旱 四年春襄陽旱首種不
入 五年浙西鎮江常州蜀綿州及淮南江東西旱

六年衡永楚高郵旱 七年湖南旱諸道自四月不雨
行都自七月不雨皆至九月越台婺常潤秀隆興興國
臨江江筠撫吉饒信徽池建康南康舒蘄黃和無爲潭
衡永江陵皆大旱 八年正月甲戌積旱始雨七月不
雨至於十一月越婺衢嚴湖常臨安鎮江江陰建康饒
信徽南康廣德興國江陵德安鄂復漢陽信陽荆門昌
長寧京西淮郡皆旱徽楚嚴越尤甚 九年五月不雨
至於七月潤婺處溫洪吉撫筠袁臨江建昌江陵德安
潭鄂復漢陽荆門信陽恭合昌普資渠利闡忠涪萬梁
山南平廣安襄陽皆旱 十年六月旱至於七月江淮

建康和興國恭涪瀘合金南平旱 十一年四月不雨
至於八月吉贛建昌福泉汀漳潮梅循邕賓象興元金
洋西和皆旱吉興元尤甚冬不雨至明年二月 十四
年五月旱臨安鎮江嚴常湖秀紹興衢婺處明台饒信
隆興江吉撫筠袁臨江興國建昌皆旱 十五年舒州
旱 紹熙元年重慶蘄州池州旱 二年五月真揚通
泰楚滁和高郵盱眙及蜀普隆涪渝遂富順監皆旱簡
資榮州大旱 三年夏郢揚和三州大旱秋簡資普榮
叙隆富順監復大旱 四年綿州大旱亡麥簡資普渠
合州廣安軍旱江浙自六月不雨至於八月婺台信鎮

江江陵江西淮東旱 五年浙東西自去冬不雨至於
夏秋常秀鎮江江陰大旱淮東西旱廬和濠楚爲甚江
西七郡秋旱 慶元三年潼利夔路十五郡旱自四月
至於九月金蓬普州大旱 六年四月旱常州鎮江府
大旱水竭淮郡自春無雨首種不入及京襄皆旱 嘉
泰元年夏五月旱浙西郡縣及蜀郡十五皆大旱 二
年春旱至於夏秋浙西湖南江東旱常秀潭永鎮江建
康爲甚 四年五月不雨至七月浙東江西旱 開禧
元年夏浙東西不雨百餘日衢婺嚴越大旱澧忠涪亦
大旱 二年南康軍江西湖南北旱 三年二月不雨

嘉定元年夏旱至七月乃雨 二年四月旱首種不入至七月乃雨浙西大旱常潤爲甚淮東西江東湖北皆旱 四年資昌普合州旱 六年五月不雨至七月江陵德安漢陽旱 八年春旱首種不入至八月乃雨江浙淮閩皆旱衢婺溫台明徽池真太平建康寧國廣德興國南康盱眙安豐爲甚 十年七月不雨 十一年秋不雨至於冬淮郡及常州鎮江建康江陰廣德旱蔬麥皆枯 十四年浙閩廣旱明台衢婺溫福爲甚江西旱贛吉建昌爲甚 十五年五月不雨至七月贛州大旱 十六年五月不雨岳州旱

恒燠

春秋桓公十五年春亡冰劉向以爲周春今冬也 成公元年二月無冰 襄公二十八年春無冰說曰水旱之災寒暑之變天下皆同故曰無冰天下異也桓公殺兄弒君外成宋亂與鄭易邑背叛周室成公時楚橫行中國王札子殺召伯毛伯晉敗天子之師於貿戎天子皆不能討襄公時天下諸侯之大夫皆執國權君不能制漸將日甚善惡不明賞罰不行周失之舒秦失之急故周衰亡寒歲秦滅亡燠年

漢武帝元狩六年冬亡冰先是比年遣大將軍衛青霍

去病攻祁連絕大幕窮追單于斬首數十萬級還大行
慶賞乃閔海內勤勞遣博士褚大等六人持節巡行天
下存賜鰥寡假予困乏舉遺逸獨行君子郡國有以便
宜上者丞相御史以聞天下咸喜 昭帝始元二年冬
亡冰是時上年九歲大將軍霍光秉政始行寬緩欲以
說下
後齊天保八年三月大熱人或暍死劉向五行傳曰視
不明用近習賢者不進不肖不退百職廢壞庶事不從
其過在政教舒緩時帝狂躁荒淫無度之應
唐天寶元年冬無冰謂陰失節也又曰知罪不誅其罰

燠夏則暑殺人冬則物華實蓋當寒反燠象宜刑而賞
之也 貞元十四年夏大燠 元和九年六月大燠
長慶二年冬少雪不冰凍草木萌莢如正月 廣明元
年十一月煖如仲春

宋淳化二年冬京師無冰 大中祥符二年京師冬溫
無冰 天聖五年夏秋大暑毒氣中人占者曰此洪範
所謂恒燠也 嘉祐六年冬京師無冰 治平四年冬
無雪 元豐八年冬無雪 元祐元年冬無雪 四年
冬無雪 五年冬無冰雪 紹興五年五月大燠四十
餘日草木焦槁山石可灼人死於暑者甚衆 三十一

年冬無雪 乾道三年冬溫少雪無冰 五年冬溫亡
雪 六年冬復溫無雪無冰 紹熙三年潼川路不雨
氣燠如仲夏日月皆赤榮州尤甚 慶元元年冬無雪
四年冬無雪越歲春燠而雷 六年冬燠無雪桃李
華蟄蟲不藏管子曰臣乘君威則陰侵陽盛冬不冰時
韓侂胄擅朝陰脅陽之象 開禧三年冬少雪 嘉定
元年春燠如夏 六年冬燠無冰有雷昆蟲不蟄 八
年夏五月大燠草木枯槁百泉皆竭行都斛水百錢江
淮盃水數十錢暍死者甚衆 九年冬無雪 十三年
冬無冰臘無雪越歲春暴燠土燥泉竭

文獻通考卷第三百四

乾隆十二年校刊

文獻通考卷三百四 物異十

文獻通考卷第三百五

鄱陽馬端臨貴與著

物異考十一

恒寒

春秋桓公八年十月雨雪周十月今八月也未可以雪

劉向以為時夫人有淫齊之行而桓有妬媚之心師古曰媚

謂夫妬婦也音莫報反 夫人將殺其象見也師古曰謂桓不覺寤

後與夫人俱如齊而殺死凡雨陰也雪又雨之陰也出

非其時迫近象也董仲舒以為象夫人專恣陰氣盛也

定公元年十月隕霜殺菽菽大豆劉向以為周十月今

乾隆十二年校刊

物異十一

八月也陰氣未至君位而殺誅罰不由君出在臣下之象是時季氏逐昭公公死於外定公立故天見災 僖公二年十月隕霜不殺草為嗣君微失秉事之象也其後卒在臣下則災為之生矣異故言草災故言菽重殺穀以其重於殺草也 一曰菽草之難殺者也言殺菽知草皆死也言不殺草知菽亦不死也董仲舒以為菽草之强者天戒若曰加誅於強臣言菽以微見季氏之罰也

考王六年六月秦雨雪 威烈王四年四月晉大雨雪

秦始皇初即位尚幼委政太后太后淫於呂不韋及嫪

毐嫪郎到反封毐為長信侯以太原郡為毐國宮室苑

囿自恣政事斷焉故天冬雷以見陽不禁閉以涉危害舒輿迫近之應也始皇既冠毐懼誅作亂始皇誅之斬首數百級大臣二十人皆車裂以殉夷滅其宗遷四千餘家於房陵是歲四月寒民有凍死者數年之間緩急如此寒燠輒應此其效也劉歆以為大雨雪及未當雨雪而雨雪及大雨雹隕霜殺菽皆常寒之罰也京房易傳曰有德遭陰茲謂逆命厥異寒誅過深當燠而寒盡六日亦為雹害正不誅茲謂養賊寒七十二日殺蜚禽道人始去有道之人去 茲謂傷其寒物無霜而死涌水出戰不量敵茲謂辱命其寒雖雨物不茂聞善不予厥咎龔

漢文帝四年六月大雨雪後三年淮南王長謀反發覺

遷道死

師古曰遷於蜀未至而死於雍故曰道死

京房易傳曰夏雨雪戒臣

為亂

景帝中六年三月雨雪其六月匈奴入上郡取

苑馬吏卒戰死者二千餘人明年條侯周亞夫下獄死

武帝元光四年四月隕霜殺草木先是二年遣五將

軍二十萬眾伏馬邑下欲襲單于單于覺之而去自是

始征伐四夷師出三十餘年天下戶口減半京房易傳

曰興兵妄誅茲謂亡法厥災霜夏殺五穀冬殺麥誅不

原情茲謂不仁其霜夏先大雷風冬先雨乃隕霜有芒

角賢聖遭害其霜附木不下地佞人依刑茲謂私賊其

霜在草根土隙間不教而誅茲謂虐其霜反在草下

元狩元年十二月大雨雪民多凍死是歲淮南衡山王

謀反發覺皆自殺使者行郡國治黨與

師古曰行音下更反

坐死

者數萬人 元鼎二年三月雪平地厚五尺是歲御史

大夫張湯有罪自殺丞相嚴青翟坐與三長史謀陷湯

師古曰謂朱買臣為丞相長史王朝及邊通皆守丞相長史也

青翟自殺三長史皆棄

市 元鼎三年三月水冰四月雨雪關東十餘郡人相

食是歲民不占緡錢有告者以半畀之

言政急刻也

元帝

永光元年三月雨雪隕霜殺桑九月二日隕霜殺稼天

下大饑時中書令石顯用事專權與春秋定公時隕霜

同應 建昭二年十二月齊楚地大雪深五尺是歲京
 房張博為石顯所譖死 四年三月雨雪燕多死是日
 皇后親蠶疾風自西北大寒雨雪壞敗其功 成帝陽
 朔四年四月雨雪燕雀死後十六年許皇后自殺
 王莽天鳳元年四月隕霜殺草木 三年二月大雨
 雪關東尤甚深者一丈竹栢皆枯 四年八月大寒
 百官人馬有凍死者 地皇二年秋隕霜殺菽
 後漢靈帝光和六年冬大寒北海東萊琅邪井中冰厚
 尺餘 袁山松書曰時羣賊起天下始亂識曰寒者小人
 暴虐專權居位無道有位適罰無法又殺無罪其
 寒必 獻帝初平四年六月寒風如冬時帝流遷失政
 暴殺

右扶風雹如斗

袁山松書曰雹殺人前後雨
雹此最為大時天下潰亂

吳孫權嘉禾三年九月朔隕霜傷穀按劉向說誅罰不
 由君出在臣下之象也時校事呂壹專作威福與漢元
 帝時石顯用事隕霜同應 四年七月雨雹又隕霜
 赤烏四年正月大雪平地深三尺鳥獸死者大半是年
 夏全琮等四將軍攻畧淮南襄陽戰死者千餘人其後
 權以讒邪數責讓陸議議志致卒與漢景武大雪同事
 晉武帝泰始九年四月隕霜時賈充親黨比周用事與
 魯定公漢元帝時隕霜同應 咸寧三年八月平原安
 平上黨泰山四郡霜害三豆是月河間暴風寒冰郡國

五隕霜傷穀是後征吳及討涼州賊六月汲郡廣平陳留滎陽雨雹隕霜傷秋麥千三百餘頃 太康元年三月河東高平霜雹傷桑麥 二年三月河東隕霜害桑 五年九月南安大雪折木 六年三月齊郡臨淄等四縣樂安等八縣琅邪等八縣河間等六縣高陽等四縣隕霜傷桑麥 八年四月齊國天水二郡隕霜 九年四月隴西隕霜 十年四月郡國八隕霜 惠帝元年四月隕霜 七年七月秦雍二州隕霜殺稼 九年三月河南滎陽潁川隕霜傷禾 光熙元年閏八月霰雪劉向曰盛陽雨水湯熱陰氣脅之

則轉而爲雹盛陰雨雪凝滯陽氣薄之則散而爲霰今雪非其時此聽不聰之應是年帝崩 明帝太寧三年三月丁丑雨雪癸巳隕霜 成帝咸和九年八月成都大雪是歲李雄死 康帝建元元年八月大雪時政在將相陰氣盛也劉向曰凡雨陰也雪又雨之陰也出非其時迫近象也 穆帝永和三年八月冀方大雪人馬多凍死 十年五月涼州雪明年張祚護軍張瓘廢祚更立元靚京房易傳曰夏雪戒臣爲亂 十一年四月霜 安帝義熙五年三月己亥雪深數尺

梁武帝天監三年三月六年三月並隕霜殺草京房易

傳曰興兵妄誅謂亡法厥罰霜是時大發卒拒魏兵於
鍾離連兵數歲 普通三年三月大雪平地三尺雨陰
也雪又陰妾不妾臣不臣之應時義州刺史文僧朗以
州叛於魏臣不臣之應也 大同三年六月胸山隕霜
七月青州雪害苗稼時交州刺史李賁舉兵反僭號擊
之不克 十年十二月大雪平地二尺時邵陵王綸湘
東王繹武陵王紀並權侂人主頗爲驕恣皇太子甚惡
之帝不能抑損及侯景之亂諸王擁強兵不勤王委棄
君父自相屠滅國竟以亡

陳宣帝太建十年八月隕霜殺稻菽時大興師衆與周
師相拒於呂梁

東魏靜帝興和二年五月大雪時神武作宰發卒十餘
萬築鄴城百姓怨思 武定四年二月大雪人畜凍死

相望於道時步落稽舉兵反寇亂數州人多死亡又爾
朱文暢等謀害神武事泄伏誅黨與多濫死

北齊武成河清元年歲大寒識曰殺無罪其寒必異時
帝淫於文宣李后又殺其子寃酷之應 二年二月大

雪連月南北千餘里平地數尺繁霜晝下時突厥可汗
與周師入并州殺掠吏人不可勝紀 後主天統二年

大雪 三年正月大雪平地二尺 武平三年正月又

大雪時馮淑妃陸令萱內制朝政陰氣積盛故天變屢見

唐太宗貞觀元年秋霜殺稼京房易傳曰人君刑罰妄行則天應之以隕霜 三年北邊霜殺稼 高宗永徽二年綏延等州霜殺稼 顯慶四年二月壬子大雨雪方春少陽用事而寒氣脅之古占以爲人君刑法暴濫之象近常寒也 咸亨元年十月癸酉大雪平地三尺人多凍死 儀鳳三年五月丙寅高宗在九成宮霖雨大寒兵衛有凍死者 調露元年八月邠慶寧涇原五州霜 開耀元年冬大寒 武后證聖元年六月睦州

隕霜殺草吳越地燠而盛夏隕霜昔所未有 四年四月延州霜殺草四月純陽用事象人君當布惠於天下而反隕霜是無陽也 久視元年三月大雪 中宗神

龍元年三月乙酉睦州暴寒且冰 元宗開元十二年八月潞綏等州霜殺稼十五年天下州十七霜殺稼二十九年九月丁卯大雨雪大木偃折 代宗大歷四年六月伏日寒 德宗貞元元年正月戊戌大風雨寒丙午又大風雪寒民饑多凍死者 十二年十二月大雪甚寒竹栢柿樹多死占曰有德遭險厥災暴寒 十九年三月大雪 二十年二月庚戌始雷大雨雹震電大

雨雪既雷則不當雪陰脅陽也如魯隱公之九年 憲
宗元和二年七月邠寧等州霜殺稼 六年十二月大
寒 八年十月東都大寒霜厚數寸雀鼠多死 九年
三月丁卯隕霜殺桑 十二年九月己丑雨雪人有凍
死者 十四年四月淄青隕霜殺惡草及荆棘而不害
嘉穀 十五年八月己卯同州雨雪害稼 穆宗長慶
元年二月海州海水冰南北二百里東望無際 敬宗
寶歷元年八月邠州霜殺稼 文宗太和三年秋京畿
奉先等八縣早霜殺稼 六年正月雨雪踰月寒甚
九年十二月京師苦寒 武宗會昌三年春寒大雪江

左尤甚民有凍死者 宣宗大中三年春隕霜殺桑
懿宗咸通五年冬隰石汾等州大雨雪平地深五尺
僖宗中和元年春霜秋河東早霜殺稼 昭宗景福二
年二月辛巳曹州大雪平地二尺 天復二年三月浙
西大雪平地三尺餘其氣如煙其味苦十二月又大雪
江海冰 天祐元年九月壬戌朔大風寒如仲冬浙東
浙西大雪吳越地氣常燠而積雪近常寒也
宋太祖建隆三年春延寧二州雪盈尺溝洫復冰草木
不華丹州雪二尺許棣州厭次縣隕霜殺桑民不蠶
太宗太平興國七年三月宣州霜雪害桑稼 雍熙四

年冬南康軍大雨雪江水冰勝重載 端拱元年閏五
月鄆州風雪傷麥 淳化三年三月商州霜花木皆死
九月京兆府大雪殺苗稼 四年二月商州大雪民多
凍死 真宗咸平四年三月丁丑京師及近畿諸州風
雪損桑 景德四年七月渭州瓦亭寨早霜傷稼 大
中祥符九年十一月大名府澶州相州並霜害稼 天
禧元年十二月京師大雪苦寒人多凍死路有僵尸遣
中使瑾之四郊 二年正月永州大雪六晝夜方止江
溪魚皆凍死 仁宗至和元年正月京師大雪貧弱之
民凍死者甚衆 二年河東自春至夏隕霜殺桑 嘉

祐四年正月自冬雨雪泥塗盡冰都民饑寒死於道路
者甚衆 哲宗元祐二年冬京師大雪連月至春不止
久陰常寒罷上元節游幸降德音諸道 八年十一月
京師大雪多流民 元符二年正月甲辰朔御大慶殿
受朝賀以雪罷 徽宗政和三年十一月大雨雪連十
餘日不止平地八尺餘冰滑人馬不能行詔許百官乘
轎入朝飛鳥多死 七年十二月大雪詔收養內外乞
丐老幼 欽宗靖康元年閏十一月大雪盈三尺不止
天地晦冥或雪未下時陰雲中有雪絲長數寸墮地
二年正月丁酉大雪天寒甚地冰如鏡行者不能定立

是月乙卯車駕在青城大雪數尺人多死 高宗建炎三年六月久陰霖雨而寒京房謂害正不誅茲謂養賊後連誅叛將 紹興元年二月寒食日雪 七年二月霜殺桑稼 十三年三月雪 二十八年三月雨雪三十一年正月戊子大雨雪至己亥逾旬不止禁旅壘舍有壓者時久雪寒甚 孝宗乾道元年三月暴寒苗稼多凍死 二年春大雨寒至於三月損蠶麥京房以爲聞善不予其寒雖雨物不茂 六年夏五月大風雨寒稼多腐敗 淳熙十二年淮水冰斷流與唐志長慶海冰同占十二月大雪至明年正月或雪或霰或雹或

雨冰或冰沍尺餘連日不解台州雪深丈餘民凍死十六年四月戊子成州天水縣大雨雪麥皆凍死七月階成鳳西和四州霜殺稼盡與漢永光夏霜同占 光宗紹熙元年三月留寒至立夏不退 二年正月行都大雪積沍河冰厚尺餘寒甚是春雷雪相繼凍雨彌月三年九月丁未和州隕霜連三日殺稼是月淮西郡國稼皆肅於霜民大饑 寧宗慶元六年五月亡暑氣如凜秋 嘉定六年六月亡暑夜寒與京房當燠而寒同占

雹 木冰 冰花

劉向以木冰為木不曲直唐志以冰花為華孽愚按木不曲直與華孽者皆花木失其常性而為妖者也若木冰乃寒脅木而成冰則妖不在木也冰花乃冰有異而結花則妖不在花也故以與雹同類而附恒寒之後云

春秋成公十六年正月雨木冰劉歆以為上陽施不下通下陰施不上達故雨而木為之冰音紛氣寒木不曲直也劉向以為冰者陰之盛而水滯也木者少陽貴臣卿大夫之象也此人將有害則陰氣脅木木先寒故得雨而冰也時叔孫僑如出奔公子偃誅死僑如淫謀作亂出奔偃預

僑如之一曰時晉執季孫行父又執公此執辱之異信謀故誅一曰時晉執季孫行父又執公此執辱之異信僑如之譜故或曰今之長老名木冰為木介介者甲甲

兵象也是歲晉有隰陵之戰楚王傷目而敗屬常雨也僖公二十九年秋大雨雹劉向以為盛陽雨水溫煖

而湯熱陰氣脅之不相入則轉而為雹盛陰雨雪凝滯而冰寒陽氣薄之不相入則散而為霰師古曰霰雨雪雜下音先見反故沸湯之在閉器而湛於寒泉則為冰孟康曰投湯器中以沈寒泉而成也師古曰及雪之銷亦冰解而散此其驗也故雹者陰脅陽也春秋不書霰者猶月食也僖公末年信用公

子遂遂專權自恣將至於殺君故陰脅陽之象也僖公

不寤遂終專權後二年殺子赤立宣公師古曰公子遂東門襄仲也赤

文公太子左氏傳曰聖人在上無雹雖有不為災說曰即惡也

凡物不為災不書書大言為災也凡雹皆冬之愆陽夏

之伏陰也師古曰愆過也過陽冬溫也伏陰夏寒也昭公三年大雨雹是

時季氏專權脅君之象見昭公不寤後季氏卒逐昭公

漢武帝元鼎三年夏四月大雨雹 元封三年十二月

雷雨雹大如馬頭 宣帝地節四年五月山陽濟陰雨

雹如雞子深二尺五寸殺二十餘人蜚鳥皆死其十月

大司馬霍禹宗族謀反霍皇后廢

王莽天鳳元年七月雨雹殺牛羊

後漢和帝永元五年六月郡國三雨雹大如雞子春秋

郵曰陰氣之專精凝合生雹雹之為言合也以妾為妻

大尊重九女之妃闕而不御坐不離前無由相去之心

司與參駟房任之內歡欣之樂專政夫人施而不博陰

精凝而見滅易識曰凡雹者過由人君惡聞其過抑賢

不揚內與邪人通取財利蔽賢是時和帝用酷吏周紆

施之並當雨不雨故反雹下也

為司隸校尉刑誅深刻古今注曰光武建武十年十月

年河南平陽雨雹大如杯壞敗吏民屋舍十五年十二

月乙卯鉅鹿雨雹傷稼永平三年八月郡國十二雨雹

傷稼十年郡國十八或雨雹蝗易緯曰夏雹者治道煩

蝗蟲傷穀救之舉賢良爵有

功務寬大無誅罰則災除

安帝永初元年雨雹

二年雨雹大如雞子 三年雨雹大如鴈子傷稼劉向

以為雹陰脅陽也是時鄧太后以陰專陽政 元初四

乾隆十二年校刊

年六月戊辰郡國三雨雹大如杆杯及雞子殺六畜古

注曰樂安雹如杆殺人京房占曰夏雨雹天下兵大作延光元年四月郡國二十

一雨雹大如雞子傷稼是時安帝信讒無辜死者多臣

按尹敏傳是歲河西大雨雹如斗安帝見孔季彥問其故對曰此皆陰乘陽之徵也今貴臣擅權母后黨盛陛下宜修聖德

三年雨雹大如雞子古今注曰順帝永建五年郡國十二

雨雹六年郡國十二桓帝延熹四年五月己卯京都雨

雹大如雞子是時桓帝誅殺過差又寵小人 七年五

月己丑京都雨雹是時皇后鄧氏僭侈驕恣專幸明年

廢以憂死其家皆誅 靈帝建寧二年四月雨雹 四

年五月河東雨雹 光和四年六月雨雹大如雞子是

時常侍黃門用權 中平二年四月庚戌雨雹傷稼

孫權嘉禾四年七月雨雹又隕霜劉向說雹者陰脅陽

也時呂壹作威用事詆毀重臣自太子登以下咸患毒

之與春秋公子遂專任雨雹同應也 赤烏十一年四

月雨雹時權臣聽讒將危太子誅罰過深之應也

晉武帝咸寧五年五月丁亥鉅鹿魏郡雨雹傷禾麥辛

卯鴈門雨雹傷秋稼六月庚戌汲郡廣平陳留滎陽雨

雹庚辰又雨雹隕霜傷秋麥千三百餘頃壞屋百三十

餘間癸亥安定雨雹七月丙申魏又雨雹閏月壬子新

興又雨雹八月庚子河南河東弘農又雨雹兼傷秋稼

乾隆十二年校刊

物異十一

七

三豆 太康元年三月河東高平霜雹傷桑麥四月河南河內河東魏郡弘農雨雹傷麥豆是月庚午畿內縣二及東平范縣雨雹癸酉畿內縣五又雨雹五月東平平陽上黨鴈門濟南雨雹傷禾麥三豆是時王濬有大功而權戚互加陷抑帝從容不斷陰脅陽之應也 二年二月辛酉隕霜於濟南琅邪傷麥壬申琅邪雨雹傷麥三月甲午河東隕霜害桑五月丙戌城陽章武琅邪雨雹傷麥庚寅河東樂安東平濟陰弘農濮陽齊國頓邱魏郡河內汲郡上黨雨雹傷禾稼六月郡國十七雨雹七月上黨雨雹 三年十二月大雪 五年七月乙

卯中山東平雨雹傷秋稼甲辰中山雨雹 六年六月滎陽汲郡鴈門雨雹 九年正月京都大風雨雹發屋拔木 惠帝元康二年八月沛及蕩陰雨雹 三年四月滎陽雨雹六月弘農湖城華陰又雨雹深三尺時賈后凶淫專恣與春秋魯桓公夫人同事陰氣盛也 五年六月東海雨雹深五寸十二月丹陽建業雨雹 七年五月魯國雨雹 九年五月雨雹 永寧元年七月襄城河南雨雹十月襄城河南高平平陽又雨雹折木傷稼 元帝太興二年三月丁未成都風雹殺人 三年三月海鹽雨雹時王敦陵上 明帝太寧二年四月

京都大雨雹燕雀死 三年四月大雨雹是年帝崩尋
有蘇峻之亂 成帝咸和六年三月雨雹時帝幼弱政
在臣下 咸康二年正月皇后見於太廟其夕雨雹
穆帝永和五年六月臨漳暴風震電雨雹大如升 海
西太和三年四月雨雹折木 孝武太元二年四月雨
雹 十二年四月己丑雨雹 二十年五月上虞雨雹
二十一年四月雨雹是歲帝暴崩 安帝隆安二年
三月雹 三年四月江陵雨雹是時安帝蒙塵 義熙
元年四月雨雹 五年五月溧陽雨雹九月廣陵雨雹
六年五月雨雹 八年四月六月皆雨雹 十年四

月雨雹

石勒時雹起西河界山大如雞子平地三尺滂哀都反
下丈餘行人禽獸死者萬數歷太原樂平武鄉趙郡
廣平鉅鹿千餘里樹木摧折禾稼蕩然勒正服東堂
以問徐光曰歷代以來有斯災幾也光對曰周漢魏
晉皆有之雖天地之常事然明主未始不爲變所以
敬天之怒也去年禁寒食介推帝鄉之神也歷代所
尊或者以爲未宜替也一人吁嗟王道尚爲之虧况
羣神怨憾而不怒動上帝乎縱不能令天下同爾介
山左右晉文之所封也宜任百姓奉之勒下書曰寒

食既并州之舊風朕生其俗不能異也前者外議以子推諸侯之臣王者不應爲忌故從其議倘或由之而致斯災乎子推雖朕鄉之神非法食者亦不得亂也尚書其促檢舊典定議以聞有司奏以子推歷代攸尊請普復寒食更爲植嘉樹立祠堂給戶奉祀勒黃門郎韋謏駁曰按春秋藏冰失道陰氣發泄爲雹自子推已前雹者復何所致此自陰陽乖錯所爲耳且子推賢者曷爲暴害如此求之冥趣必不然矣今雖有冰室懼所藏之冰不在固陰沍寒之地多皆川池之側氣泄爲雹也以子推忠賢令縣介之間奉之

爲允於天下則不通矣勒從之於是遷冰室於重陰凝寒之所并州復寒食如初

宋文帝元嘉十八年三月雨雹

梁武帝中大通元年四月大雨雹洪範五行傳曰雹陰脅陽之象時帝數捨身爲奴拘信佛法爲沙門所制

陳宣帝太建二年六月大雨雹 十年四月又大雨雹 十三年九月大雨雹時始興王叔陵驕恣帝又寵遇之後卒爲亂

唐太宗貞觀四年秋丹延北承等州雹 高宗顯慶二年五月滄州大雨雹中人有死者 咸亨元年四月庚

午雍州大雨雹 二年四月戊子大雨雹震電大風折木落則天門鴟尾三先儒以為雹者陰脅陽也又曰人君惡聞其過抑賢用邪則雹與雨俱信讒殺無罪則雹下毀瓦破車殺牛馬 永淳元年五月壬寅定州大雨雹害麥禾及桑 武后天授二年六月庚戌許州大雨雹 證聖元年二月癸卯滑州大雨雹殺燕雀 神功元年媯綏二州雹 聖歷元年六月甲午曹州大雨雹 久視元年六月丁亥曹州大雨雹 長安三年八月京師大雨雹人畜有凍死者 中宗神龍元年四月壬子雍州同官縣大雨雹殺鳥獸 景龍元年四月己巳

曹州大雨雹 二年正月己卯滄州雨雹如雞子 元宗開元八年十二月丁未滑州大雨雹 二十二年五月戊辰京畿渭南等六縣大風雹傷麥 代宗大歷七年五月乙酉雨雹 德宗貞元二年六月丙子大雨雹 十七年二月丁酉雨雹己亥霜戊申夜震霆雨雹庚戌大雨雪而雹五月戊寅好時縣風雹害麥 十八年七月癸酉大雨雹 憲宗元和元年鄜坊等州雹 十年秋鄜坊等州風雹害稼 十二年夏河南雨雹中人 有死者 十五年三月京畿興平醴泉等縣雹傷麥 穆宗長慶四年六月庚寅京師雨雹如彈丸 文宗太

和四年鄜坊等州雹 五年夏京畿奉先渭南等縣雨
雹 開成二年秋河南雹害稼 四年七月鄭滑等州
風雹 五年六月濮州雨雹如拳殺人三十六牛馬甚
衆 武宗會昌元年秋登州雨雹文登尤甚破瓦害稼
四年夏雨雹如彈丸 僖宗乾符六年五月丁酉宣
授宰臣豆盧瑑崔沆制殿庭氛霧四塞及百官班賀於
政事堂雨雹如鳧卵大風雷雨拔木 廣明元年四月
甲申朔汝州大風雨拔街衢樹十二三東都有雲起西
北大風隨之長夏門內表道古槐樹自拔者十五六宮
殿鴟尾皆落雨雹大如杯鳥獸殞於川澤

宋太祖建隆元年十月大名府臨清縣雨雹傷稼 二
年七月丹州義川雲巖二縣大雨雹 三年七月潞州
武鄉等四縣雨雹 四年七月海州風雹 乾德二年
四月開封府陽武縣雨雹宋州寧陵縣風雨雹傷民田
六月潞州風雹七月同州郃陽縣雨雹並害稼八月延
州膚施縣風雹隕霜 三年四月開封府尉氏扶溝二
縣風雹害民田桑棗十損七八六月曹州濟陰冤句二
縣風雹損田 六年八月河南府河清縣雨雹 開寶
三年夏同州滑州大風雨雹害稼 四年八月鄆州須
城等三縣風雹 八年五月邢磁州風雹害桑麥 太

宗太平興國二年六月瀛州景城縣雨雹七月相州永
 定縣大風雹害稼 五年四月大名府冠氏縣壽州安
 豐縣風雹 七年五月太平州蕪湖縣雨雹傷稼 八
 年五月相州風雹傷民田 端拱元年五月霸州大雨
 雹殺麥苗閏五月鄆州雨雹傷麥 淳化元年六月許
 州大風雹壞軍營民舍千一百五十六區單州魚臺縣
 風雹害稼 至道二年十一月代州風雹傷田稼 真
 宗咸平元年九月定州北平等縣風雹傷稼 三年四
 月丁巳京師雨雹飛禽有損者 六年四月甲申京師
 暴風雨雹如彈丸 大中祥符三年八月丙辰京師雨

雹 五年八月丙辰京師雨雹 天禧元年九月鎮戎
 軍彭城寨風雹害民田八百餘畝 仁宗天聖八年五
 月丙辰大雨雹 慶歷元年七月壬午六年四月甲辰
 大雨雹 嘉祐四年四月大震電雨雹 神宗熙寧元
 年秋鄜州雨雹 三年七月七年四月五月京師雨雹
 八年夏鄜州涇州雨雹 九年二月京師雨雹 十
 年夏鄜州雨雹秦州大雨雹 哲宗紹聖三年十月辛
 未西南方有雷聲次大雨雹 四年二月癸卯京師雨
 雹自辰初至申 徽宗建中靖國元年二月丙申京師
 雨雹五月辛酉京師又大雨雹 崇寧三年十月辛丑

大觀元年十月己巳三年五月戊申京師大雨雹 政
和七年六月京師大雨雹如拳或如升器幾兩時止
宣和四年二月癸卯京師雨雹 欽宗靖康元年十二
月己卯庚辰京師雨雹 高宗建炎三年八月甲戌大
雨雹劉向以爲盛陽雨水陰氣脅之不相入則轉而爲
雹故雹者陰脅陽也一日人君惡聞其過朋邪爲利蔽
賢施之則雹與雨俱信讒殺無罪則雹下毀瓦破車殺
牛馬 紹興元年二月壬辰上在越州雨雹雷 二年
二月丙子上在臨安大雨雹 三年正月辛未雨雹震
雷陰氣之專精凝合生雹陽不禁閉則非時雷出陰脅

陽象也三月己未雨雹傷稼 五年閏二月乙巳朔雨

雹雪十月丁未秀州華亭風雷雨雹激射疾於箭彈壞
舟覆屋十二月戊辰又雹 七年二月癸卯先一夕雷

後一日雪癸丑又雹按晉書雷以二月出陽出發洩明
日便大雪皆失節之異又春秋以陰脅陽爲臣專權時
秦檜始大用是其應也 八年六月丙辰大雨雹 九

年二月甲戌雹傷麥十二月辛未又雹 十年二月辛

亥大雨雹十二月庚辰又雹 十一年正月辛酉雨雹

十三年二月甲子雨雹傷麥五月戊午夜雹七月壬

申雹害稼十一月己未又雹 十七年正月庚辰雨雹

五月乙丑又雹 二十一年三月己卯雹傷禾麥 二
十八年四月辛亥雨雹 二十九年二月戊戌雹損麥
孝宗隆興元年三月丙申夜雨雹 二年二月丁丑
雹與霰俱劉向以爲雹陰脅陽霰陽薄陰也四月庚午
雹七月丁未雨雹十二月己亥雨雪而雹 乾道元年
二月庚寅夜雹 二年十月辛卯雨雹 三年二月壬
午雪癸未雹 四年正月癸未夜雹有霰二月丁酉又
雹乙卯又雹而雪 五年二月丙午雹損麥 六年二
月壬午雹亦損麥 八年七月壬辰雨雹 淳熙三年
四月丁亥雨雹癸巳天台臨海二縣大風雹傷麥 四

年正月丙寅雨雹 六年正月丁丑雹傷麥三月壬申
夜大雨雹如彈丸 八年十二月甲寅雨雹 十二年
二月辛酉夜有雹 十三年閏七月丙午雨雹 十五
年二月丁亥雨雪而雹六月丁卯又雹 十六年二月
己卯雹與雨俱 光宗紹熙元年二月丙申雪丁酉雹
二年正月戊寅大雹震雷電以雨二月庚辰大雪連
數日雷陽也雪陰也旣雷則不當雪皆失節之應乙酉
宰臣
留正奏土木繁興傷和之應上亟命
停皇后家廟之役詔羣臣言闕政 二月庚寅朔建寧
府大風雨雹什屋殺人三月癸酉又大風雨雹大如桃
李實平地盈尺壞城郭民舍七百餘家鄉落四千三百

餘家禾苗不殖桑麻種麥蔬果皆損温州瑞安縣亦如
之壞屋殺人尤眾皆令各郡振之秋西和州祐川縣大風雹壞

粟麥種稔 寧宗慶元三年二月戊辰雪己巳雹四月

乙丑雨雹大如杯破瓦殺燕雀 嘉泰元年三月丙寅

丁卯戊辰連雨雹五月丁丑又雹七月癸亥大雨而雹

二年四月庚寅雨雹傷稼六月庚子大風雹而寒陰

脅陽又常寒也 四年正月壬辰雪與雹俱 開禧二

年正月己酉雨雹而雷 嘉定元年閏四月壬申雨雹

害稼 二年三月乙未雨雹 六年夏江浙郡國多雨

雹害稼 十五年九月癸丑大震雨雹陽不閉陰脅陽

皆君道弱臣道彊之象 十六年秋又雹

木冰

魏文帝黃初六年正月雨木冰是年六月利成郡兵蔡

方等殺太守徐質據部反太守古諸侯貴臣有害之應

也一說木介甲兵之象是歲既討蔡方又帝自將舟師

征吳成卒十餘萬連旌數百里臨江觀兵是其應也

晉元帝太興三年二月辛未雨木冰後二年周顛等遇

害是陽施不下通也 穆帝永和八年正月乙巳雨木

冰是年殷浩北伐明年軍敗十年廢黜 孝武太元四

年十二月乙巳雨木冰明年王恭庾楷殷仲堪居外藩

與王國寶等構怨終同夷滅

東魏孝靜武定四年冬天雨木冰時司徒侯景專制河南神武薨景舉兵反慕容紹宗討平之

北齊後主天保元年雨木冰三日時清河王岳爲高歸彥所譖憂死 武平元年冬雨木冰明年二月又雨木

冰時錄尚書事和士開專政琅邪王儼矯詔殺之儼等遇害 六年七月頻歲雨木冰其年周師入晉陽

唐高宗永徽二年十一月甲申陰霧凝凍封樹木數日不解劉向以爲木少陽貴臣象此人將有害則陰氣脅木先寒故得雨而冰亦謂之樹介兵象 麟德元年十

二月癸酉氛霧終日不解甲戌雨木冰 儀鳳三年十

一月亦如之 武后延載元年十月癸酉白霧木冰

中宗景龍四年三月雨木冰 元宗開元二十九年十

一月雨木冰寒甚數日不解 代宗永泰元年三月雨

木冰 大歷二年十一月氛霧如雪草木冰 德宗貞

元元年十二月雨木冰 二十年冬雨木冰 穆宗長

慶三年十一月雨木冰 敬宗寶歷元年十一月雨木

冰 文宗太和七年十二月夜霧木冰 開成四年九

月雨雪木冰 武宗會昌元年十二月雨木冰 四年

正月木冰

乾隆十二年校刊

後晉高祖天福十二年十一月旦日天大昏霧木有冰
至十一日霜露着草木皆爲冰時魏府杜重威叛討降
之至來年正月二十七日高祖崩

後周太祖廣順三年十一月雨木冰

宋真宗咸平元年十一月庚戌雨木冰 大中祥符五

年正月戊寅京師雨木冰 仁宗慶歷三年十二月大

雨雪木冰占曰兵象 英宗治平二年十月乙巳雨木

冰 神宗熙寧三年十月 八年正月京師雨木冰

哲宗元祐八年二月京師大寒霰雪雨木冰 徽宗宣

和五年十月乙酉雨木冰 欽宗靖康元年十月乙卯

雨木冰 二年正月丁酉雨木冰

冰花

唐昭宗景福中滄州城塹中冰有文如畫大樹華葉芬
敷者時人以爲地當有兵難近華孽也

後晉出帝開運二年正月東京封邱門外壕內冰上有
文若大樹華芬敷之狀相連數十株宛如圖畫

宋真宗景德元年二月保順軍城壕冰隱起文爲桃李
華雜人物之狀 大中祥符九年正月霸州渠冰有文

如花葩狀 高宗紹興七年十二月中書門下省檢正

官張宗元出撫淮西軍寓家建康府盆冰有文如畫佳

卉茂木華葉芬敷日易以水變趣奇出盡春暄乃止近
華孽也說曰其地當有兵難 孝宗淳熙初秀州呂氏
家冰瓦有文樓觀車馬人物並蒂芙蓉重莢牡丹長春
萱草藤蘿經日不釋亦華孽類也

中興以來長老所記或雨而木冰或霜而木冰者甚
多不曰異郡國不以聞蓋日官失之故木冰無錄者

文獻通考卷第三百五



